



UNIVERSITÄTS-
BIBLIOTHEK
PADERBORN

Universitätsbibliothek Paderborn

Vita S. Liborii Episcopi, Calcvo Laborantivm Patroni

Bolland, Johannes

Antverpiae, 1648

Alia Vita Auctore Saxone anonymo, Ex MS. Canon. Regul. Corsendoncano
& Bodecensi.

urn:nbn:de:hbz:466:1-9573

62 VITA S. LIBORII PATRONI

Christo in æternum viuamus, cuius regnum
& imperium sine fine permanet in secula se-
culorum, Amen.

a Aliter paulò 2. Vit. oppidò Deo vulgò placere.

b De S. Liborij etate egimus §. 1. n. 4.

c Ibidem nū. 1. ostendimus quinto legendum.

ALIA VITA

Auctore Saxone anonymo,

Ex ms. Canon. Regul. Corsendoncano
& Bodecensi.

LIBER PRIMVS.

CAPVT I.

S. LIBORII gesta unde Auctor
aceperit.

Doctores &c. I.
Episcopi à
Deo dati,



Vamuis multifariām mō-
disque ineffabilibus super-
næ bonitatis erga salutem
humanī generis pia dispen-
satio cognoscatur; in hoc
tamen maximis videtur clarescere indicijs,
quod Ecclesiæ suæ, in hac mortali conuersa-
tione pro æternæ vitæ præmio laboranti, ta-
les

les eruditores defensoresque prouidit, quorum doctrinis & exemplis informari, quorum meritis & intercessionibus possit in perpetuum adiutiari. Omnibus enim, qui in procinctu fidei positi, agone militiae Christianæ contra spirituales nequicias iugiter colluctantur, quid utilius esse credatur, quam illorum iuuant veritandas praœ oculis habere virtutes, qui in eodem agone legitimè certantes, perpetuam Ecclesiam bo, exemplo patrocinio; adepti sunt victoriæ coronam: Quid felicius, quam eorum precibus muniri, quibus cuncta, quæ petierint, praestanda Veritas ipsa promittit? De his enim loquimur, qui verè in Christo manentes, eiusque in se verba manere facientes, illud consequunti sunt præmium, quod ipse promisit, dicens: Quodcumque voluntatis petetis, & fiet vobis.

2. Hoc equidem licet ad Apostolos specialiter dictum sit, pertinet tamen nihilominus etiam ad alios quosque excellentiâ sanctitatis insignes; illos præcipue, qui Apostolorum tam meriti quam officij successione sublimati, perenni resurgent gratiâ sacri præsulatus. Ij namque tanto facilius à Deo quælibet impetrant, quanto ei & per puritatem conuersationis, & per sublimitatem sacri ordinis appropinquant. Nec dubium quin plurimum illorum preces apud Dominum valeant, quorum ipse potestatem tantum in cælo terraque valere concessit, ut quidquid hinc ligarent, maneret ibi ligatum; quidquid hinc solueret,

64 VITA S. LIBORII PATRONI

soluerent, esset protinus ibi solutum. Præterea illorum officij dignitatem ipse inhabitator & consecrator eorum Spiritus sanctus ostendit,

Malac. 2.7. qui per Prophetam Malachiam loquitur, dicens: Labia Sacerdotis custodient scientiam, & legem requirent ex ore eius: quia Angelus

Apoc. 1.20. Domini exercituum est. Hinc in Apocalypsi *Angeli & Ioannis*, Ecclesiarum Præfules non nisi *Angeli* vocantur, signati per septem stellas, in Christi dexterâ demonstratas. Sunt enim stellæ, quia virtutibus radiant; Angeli, quia mandata Diuinæ iussionis annuntiant. Constat igitur, eos non parum transcendere modum infirmitatis humanæ, quos toties Scriptura sancta non dubitat Angelos appellare.

3. a Ipsorum verò in Ecclesiâ Principes & primi propagatores, Apostoli fuere, qui post gloriosam Domini nostri Iesu Christi ad cælos ascensionem, iuxta promissionem ipsius, Sancti spiritus infusione roborati, & scientiâ omnis veritatis instructi, in diuersas mundi totius penè profecti sunt regiones, verbum salutis annuntiantes ubique, & tam miraculorum signis, quam prædicationum hortamentis, id in breui efficientes, ut quemadmodum egregius olim Propheta præcinuit, In omnem terram exiret sonus eorum, & in fines orbis terræ verba eorum. Ex eorum igitur salutaribus cælestibusque doctrinis, quas ab ipso fonte veritatis largiter hauserant, Ecclesiasticorum ordinum regula, diuini cultus insti-

Psal. 18.5.

*Apostolo-
rum succes-
tores.*

institutio, & tota Catholicæ religionis obseruatio sumpit exordium. Post quos multi per orbem Ecclesiarum Præsules, illorum in omnibus vestigia sequuti, & eorum non minùs virtutum gratiam, quam ordinis dignitatem adepti, eamdem tenuerunt in fide sinceritatem, in moribus sanctitatem, in doctrinæ studio vigilantiam; quam & fidelium mores corrigeret, & infidelium mentes ab errore conuerterent. In quo plures eorum tantum Dominō placuisse noscuntur, ut clarissimis usque hodie miraculis coruscare videantur.

4. Ex quorum gloriose collegio vix magnificus & incomparabilis extitit sanctitatis Liborius, Ecclesiæ Cenomanicæ Præsul, cuius modò proposuimus vitam & transitum breuiter commemorare; vtile ac fructuosum fore legentibus arbitrati, eius vitam actusque cognoscere, quem sequendo, possint in Divinâ seruitute proficere. Eius etenim vita nihil aliud erat, nisi quoddam cœlestis conuersationis indicium, Christianæ religionis exemplarum, virtutis ac fidei documentum. Vnde quoniam ipse Dominicum illud impleuit præceptum, Luceat lux vestra coram hominibus, ut videant opera vestra bona, & glorificant Patrem vestrum qui in cœlis est; nobis in vita mortalis errore degentibus enitendum valde solerti imitatione videtur, ut qui vitiorum & ignorantiae tenebris obfuscatur, lucifluis bonorum eius operum radijs

E illu-

*S. Liborij
vita fidelis
ter scripta;*

Matt. 5.16.

66 VITA S. LIBORII PATRONI

illustremur. Nec nos quisquam existimet in eius laudibus à veritatis aut moderationis tramite deuiare, cùm nulla, nisi à veracibus scriptis seu relationibus comperta, proferamus: nec eum dignè à mortali lingua posse laudari, ipse, cum quo nunc immortaliter regnat, Deus visibili palam ostensione declarat. Testatur namque, cunctis eum virtutibus atque omni vita merito acceptum sibi fuisse viuentem, dum defuncti reliquias euidentissimis miraculorum signis frequenter glorificare non desinit.

*miracula
post mor-
tem,*

*quaे in vita,
vel non scri-
pta, vel de-
perdita:*

5. Ex quo datur intelligi, hac eum gratiam nequaquam in praesenti vita caruisse, quamvis inde specialia litteratum indicia qualibet ex caussa non habeantur. Siue enim, quod familiaris Sanctis omnibus semper humilitas persuadet, ut ea quae sibi ante humanos oculos laudi & gloriae videri valent, celari abscondique desiderent, hoc ipse praeceteris obtinuerit; siue gesta signorum virtutumque illius descripta quidem pleniùs, sed casu qualibet posterioru notitiae subtracta fuerint, siue aliud quid causæ fuerit ignorantes; liquidò tamen credimus, eiusdem sancti Spiritus gratiam, qui toties ante eius sacrosancta pignora præclarum sui charismatis donum, operationem scilicet virtutum, ad ipsius demonstranda merita exhibere dignatur, eidem quoque in carne posito minimè defuisse. Non tamen desunt etiam certa de eius meritis apicum moni-

monimenta. Habentur etiam gesta Pontifi- *hac unde*
 cum eiusdem, cui præfuit, Ecclesiæ Cenoma- *accepta?*
 nicæ, simplici eloquio, & absque omni næuo
 figmenti, fideli narratione contexta : in qui-
 bus non plena alicuius eorum vitæ series re-
 plicatur; sed quis cui successerit, cuius meriti
 fuerit, quot annis Ecclesiam rexerit, breuiter
 est annotatum. Huius verò sacri ac pretiosissi-
 mi viri Liborij etiam transitus ex hac valle
 lacrymarum ad societatem semper verè bea-
 teque gaudentium ciuium supernoruim, quo
 contigerit ordine, latius indicatur. Extant &
 aliæ de eius ortu & vitâ litteræ strictem exara-
 tæ, de quibus omnibus vtilissimis quibusque
 & veracissimis narrationibus defloratis, hîc
 eas, prout diuinitus facultas datur, paucis ex-
 plicate conamur.

a In ms. monasterij Bodecensis Canonico Regular.
 Ord. S. Augustini, è quo variantes lectiones nobis Ioan-
 nes Gamansius noster communicauit, hic Prologi finis,
 Vite exordium erat.

C A P V T II.

S. LIBORII à primâ ætate sanctitas;
Episcopatus.

6. **H**ic igitur ex Gallijs originem dicens, *S. Liborius*
 & parentum non ignobili ortu pro- *Gallus, no-*
sapiâ, clarissimam à patriam suorum claritu-
dine meritorum amplius illustravit. Namque grauiss,
ab ætate primæuâ, maturum in bonis actibus

68 VITA S. LIBORII PATRONI

cor gerebat, neque illecebris voluptatum carnalium, ut ætati lubricæ moris est, animo cedens, neque vitio leuitatis indulgens. Adeò verò sese humilem & quietum & tremorem sermones Domini exhibebat, ut meritò super illum sancti Spiritus gratia requieuisse credatur, quæ illum ad sacerdotij dignitatem, ac dispensationem sacramentorum Dei, ad regimen fidelis populi nutriebat. Hæc etiam illius animo flagrantissimum discendi studium inspirauerat, quatenus cælestium fluentis arcanorum, quæ multis erat quandoque largiter ructaturus, ipsius primùm præcordiorum intima salubriter implerentur. Neque vñquam peruerso quorumdam more priùs voluit docere, quām discere: sed tamquam futurum se Doctorem præsagia mente aduerteret, cunctarum ferè sibi utilium scientiam scripturarum satagebat intentus auditor acquirere, quas postmodùm, quibus opus esset, valeret facundus præceptor ingerere. Nec deerat sagacis ingenij vigor, largam bono studio efficaciam subministrans: magnam quæ in teneris adhuc annis præclaræ indolis flores spem suauissimorum fructuum præbuere, quos abundanter constat posteà prouenisse.

omnibus ea-

ritus,

Denique simul cum processu temporis, probitatis ac sophiae proficiens incrementis, ita in breui maturitatem virilis ornabat ætatis, ut acceptus apud omnes, & tam honore, quām amore, dignus haberetur. Nec mirum: quippe

quippe quem nulli elatio proteruum, nulli asperum liuor, nulli contemptibilem fecit ignauia: sed humilitas etiam infimis coapta ret, caritas cunctis exhiberet affabilem & conformem, industria demonstraret eum esse vas vtile in domo Domini, ad omne opus bonum paratum.

7. Postquam autem tam vitam, quam habitum sacerdotalem, caelestium præmiorum intuitu, dereliquit, & verè à Domino in suam electus sortem, Clerico associatus, ac officijs est functus Ecclesiasticis, amplius totum se Divino cultui visus est mancipare. Studebat namque, quantum fragili carnis sarcinâ circum datus potuit, cunctos actus cogitatusque suos ad rationis normam dirigere, circumspectus ac prouidus, docilisque & cautus existere, aduersa vel prospera æquanimiter ferre, animam supra temporalis periculi metum fortiter agere, nihilque nisi quod esset ante superni examinatoris oculos fœdum, peccati scilicet maculas, formidare: habere de Dei bonitate fiduciam, securitatem, constantiam, tolerantiam, firmitatem: prætereà nihil appetere pœnitendum, in nullo legem moderationis excedere, sub iugo rationis cupiditatem moderari vel domare. Hinc modestus & abstinentis, castus & honestus, parcus & sobrius ante Deum & homines permanebat. Iam vero in illo propositum æquitatis iustitiaeque seruandæ, quis unquam dignè valeat

E 3 expli-

70 VITA S. LIBORII PATRONI

explicare? Quis eius circa innocentiam, humanitatem & concordiam studium, quis erga pietatem & religionem enarret affectum? Omnis eius animi meditatio, à rebus vanis & eaducis remota, circa salutem animæ ac statum vitæ perpetuæ versabatur.

8. Proinde quia tantus in eo cœlestis iubaris splendor celari diu non potuit, sanctitatis eius ita rumor excrevit, ut totius inclytæ ciuitatis Cenomanicæ populi ad hunc sibi met eligendum Pontificem, vnanimiter corda conuerterent. Nec dubium, quin se beatos fore arbitrarentur, qui talem habere Pastorem ac Præsulem mererentur; cui ad docendum suppeteret linguae disertitudo, ad do-
*eligitur Ce-
 noman. Epi-
 scopus,*
*post S. Pa-
 uacium.*

ctrinam exemplis firmandam vitæ restitu-
 nando, ad exorandum pro subditis Deum meriti magnitudo. Vnde cum memoratæ vrbis populum Antistitis sui Pauacij viri sanctissimi obitus ingenti, ut par erat, mærore afficeret; consolabatur tamen huius concorditer electi probitas, & firmata de illo apud omnes fiduciæ certitudo, quod nemine Sacerdotum Christi esset inferior. Quinimò antiquam Israëliticæ gentis gratiam sibi præstitam gratulabantur: quia sicut illis quondam, ablato & ad cælum rapto Eliâ Prophetâ sanctissimo, Elisæus dupli eijs spiritu repletus successit; ita spiritales B. Pauacij virtutes, in successore Liborio repræsentandas, aut etiam duplicandas fore sciebant. Quapropter gaudentibus cunctis,

cunctis, Ecclesiæ Christi regimen, ad quod olim erat diuinitus præordinatus, iuxta morem canonicum assumpsit regulariter Pontifex ordinatus.

a Legende pars secunda : patrum suorum lignam.

C A P V T III.

S. LIBORII *mores in Episcopatu,*
prædicatio.

9. **S**Vscepto verò sacerdotio, nihil ex studio sanctitatis, quam priùs exercuerat, dereliquit; sed tamquam lucerna super candelabrum posita, ita ille Diuinâ luce repletus, quò in eminentiore constitutus est loco, eò latius in domo Dei collatæ sibi gratiæ notitiâ refalgebat. Neque illum tantæ dignitatis homines solitæ religionis mutare fecerunt monachos, nec Ecclesiasticorum occupationes negotiorum quidquam ex quotidianâ Diuinæ laudis & placationis seruitute prætermittere coegerunt. Quinimò tantò eam instantius adaugere curauit, quantò iam non suæ solius, sed multarum animarum salutis causâ recte se vivere debere sciebat: quibus frustrâ videbatur præesse, si non studeret etiam monitis exemplisque prodesse. Ob hoc igitur, nullius momenti spatiū otiosè transigere volens, *otiosus*, semper erat utilibus intentus actibus, nunc

E 4 lection-

72 VITA S. LIBORII PATRONI

lectioni diuinarum Scripturarum operam impendens, nunc orationi prolixius incumbens: interdum etiam rerum exteriorum dispositioni, prout suo conueniebat officio, prudenter consulens atque prospiciens.

10. Assiduè verò vigilijs & ieunijs castigabat corpus suum, & in seruitutem rediebat, ne alijs prædicans, ipse reprobis inueniretur. Erat enim prædicationis studio valde intentus, & tamquam se nosset gerere officium Apóstoli, dicentis, Non enim misit me Christus baptizare, sed euangelizare; atque ab eodem audiret, Prædica verbum, in ista opportunitate, importunè; ita ipse quotidie modis om-

1. Cor. 1.17. nibus auditores suos ad vitæ rectitudinem

2. Tim. 4.2. prouocabat. Cuius præcepta & monita id

assiduè prædicans, maximè populo grata & amabilia faciebat,

quòd eius vitam in nullo doctrinæ contrariam deprehendebant; sed quod illis sectandum asserebat, euidentissimè in eius moribus agnoscebant. Verbi gratiā: qui elationem velut initium omnis peccati cauendam penitus ab illo sæpè didicerant, nullum eius indicium in illius actibus, in habitu, in vultu, in gestu corporis, in sermonis vsu sentire potuerunt.

Galat. 5.16. Audiebant ab eo: Non efficiamur inanis gloriæ cupidi: videbant eum verè pauperem spiritu, numquam nisi in Domino glorificari. Audiebant ab eo, quòd inuidiâ diaboli,

Sap. 2.25. mortis introiuit in orbem terrarum: & Putredo ossium, inuidiâ: videbant eum affectu be-

Prou. 14.30. neuo-

& eadem agens:

neuolentiae gaudere cum gaudentibus, fletre cum flentibus; aliorum prospera vel aduersa, sua æstimare. Audiebant ab eo: Ira enim *Iacob.1.20.* viri, iustitiam Dei non operatur: videbant eum, omnem ostendentem mansuetudinem ad omnes homines. Audiebant ab eo: Seculi *2.Cor.7.10.* tristitia mortem operatur; videbant eum esse hilarem datorem, quem diligit Deus. Audiebant ab eo, auarum esse idolorum seruitorem: videbant eum rerum suarum erogatione *Ephes.5.5.* largissimam thesaurizare sibi thesaurum in cælo. Deinde si quis eius parsimoniam, strenuitatem, castitatemque attenderet, non alijs ad fugiendam vitiorum corporalium labem admonitionibus indigeret.

II. Ita pius gregis Dominici pastor, commissis sibi ouibus, adhibitâ curâ duplici, exhortationibus scilicet & exemplis, iter ad æternæ vitæ pabula quærenda, & spiritualium morborum dira contagia vitanda, demonstrans, tantum ex eis lucrum acquisiuit, ut, quod voce Dominicâ per Malachiam dici: *Malach.2.6.* de illo conuenienter valeat dici: Lex veritatis fuit in ore eius, & iniq[ue]itas non est inventa in labijs eius. In pace & in æquitate ambulauit mecum, & multos auertit ab iniq[ue]itate. Verè enim multos ab iniq[ue]itate convertens, & rectitudini vitæ fideique restituens, inter sanctos Ecclesiæ Christi Doctores præclarum obtinet locum: quorum multimodam gratiam, & infinitam meriti excel-

dignus ene-
mis quibus
Doctores or-
nati Scriptu-
ra;

E 5 len-
 ra;

74 VITA S. LIBORII PATRONI

lentiam, ipse verus eiusdem Ecclesiæ sponsus, in Canticis Canticorum multiplici laude prosequitur: nunc eos ipsius sponsæ collum, monilibus assimilatum, vocans; nunc tigna cedrina & laquearia cypressina cognominans; interdum labia, vittæ coccineæ, propter prædicationem Passionis Christi, similia, seu fuum dulcedinis verbi Dei stillantia, nonnumquam turrim David, ob constatię firmitatem, eos appellans. Aliquando vero ibidem, ob nutrimentum parvulorum, quibus lacte opus est, mammæ dicuntur. Aliquando fano simul & vino, aliquando decori turris eburnea comparantur. Plerumque portæ Ecclesiæ nuncupantur: & propter variam utilitatem, firmitatem, prouidentiam, contemplationem, dentium & oculorum nomine designantur. Præterea ipsi sunt sexaginta fortis, Salomonis lectulum ambientes: ipsi columnæ argenteæ, sacri eloquij nitore fulgentes. Quarum omnium similitudinum si quis mysteria perscrutetur, profectò inenarrabilem huius sanctæ Ecclesiæ Doctoris & eius similium gratiam dignitatemque reperiet, cum satis indicent hæc pauca, de pluribus ex illo cælesti epithalamio sumpta, quod nihil his illustrius, nihil pulchrius, in sponsæ laudibus decantandum Spiritus sanctus inuenit. Qui etiam de eisdem per Danielem ita loquitur: Qui autem docti fuerint, fulgebunt quasi splendor firmamenti: & qui ad iustitiam erudiunt plurimos,

quasi

Dan. 12.3.

quasi stellæ in perpetuas æternitates. Sed quoniam huic clarissimæ stellæ in erudiendis subditis ferorem pariter & splendorem ostendimus, quibus virtutum radijs in alijs quoque rebus effulserit, monstrare curemus.

C A P V T . I V .

Sacrarum rerum cura.

Habuit vir sanctus hoc præ ceteris cultum Di-
tum temporis Pontificibus, religio- uinum pra-
nis & Dei amoris indicium speciale, quod mouet:
omnia, quæ ad eius laudem iugiter celebran-
dam & Ecclesiastici cultus officium perti-
nent, totis nisibus amplificare, prouehere at-
que adornare contendit: & exceptis his, quæ
sibi suisque ad quotidiani victus & vestitus
necessaria, quibus solis contentus erat, vix
sufficere poterant, nec non & his, quæ ad
egentium & inopum sustentationem largâ
manu solebat expendere, reliquos omnes re-
ditus episcopalium possessionum, omnes
quarumlibet rerum census, qui sibi ex omni
suâ diœcesi debebantur, vel si quid ex fide- *templa op-*
lium donationibus conferebatur, ad ex- *nari;*
hibendum ecclesijs congruentem ornatum,
& noua quoque oratoria in locis, quæ ad hoc
opportuna videbantur, construenda depita-
uit. Quorum constructionem primùm Diui-
næ servitutis multiplicandæ intuitu aggre-
dieba-

76 VITA S. LIBORII PATRONI

diebatur; dehinc etiam plebium commodati pariter & saluti prospicere piè meditabatur, vt ad ecclesias cum suis Sacerdotibus propè positas facilè confluere, orationum studijs assuescere, regenerationis gratiam consequi, documenta sacræ legis audire, cœlestium sacramentorum celebrationibus interesse, atque omnia Christianæ religionis iura discere & exercere valerent: nec quemquam vllius molestiæ seu occupationis impedimentum exinde reuocaret, quò vniuersos ad salutem animarum quaerendam ipsa loci opportunitas inuitaret. Hac igitur intentione præter illas, quæ à suis prædecessoribus fabricatae fuerant, decem & septem sacris ædibus nouiter constructis & dedicatis, suam parochiam ita omnem illustrauit, vt in qualibet eius parte populo degenti aliquam orationis domum vicinam esse constaret. Locoru verò, in quibus eas construxit, hîc nomina ponere dignum ducimus, quò religiosi operis memoria firmior, & fides certior habeatur. Vnam itaque ædificauit in Colinno, alteram in Siluiaco, tertiam in Raudatio, quartam in Campogenesto, quintam in Conedaco, sextam in Aciaco, septimam in Aloncianno, octauam in Sangunno, nonam in Sabonario, decimam in Bonâ, undecimam in Luciâ, duodecimam in Lugdunâ, tertiamdecimam in Marsone, quartamdecimam in Paliaco, quintamdecimam in Magitto, sextamdecimam in Nouiliaco,

17. nouae-
dificat:

liaco, septimamdecimam in Comnis.

13. Quibus rite perfectis & decenter ad *sacra officia* ornatis, ac Sacerdotum & inferioris ordinis *affiduè in ijs fieri iubet.* Clericorum iugi prouidentiæ commendatis, obseruandum omnino censuit, ne qua ibidem legitimis horis die noctuque sacrorum intermissio fieret officiorum, quibus sanctæ & individualiæ Trinitati debitæ gratiarum actiones & laudes referrentur. Deinde ut unitati & concordiæ totius populi commissi consuleret, atque omnia illius diœceseos loca Deo dicata, cum uniuersis ad se pertinentibus, antiquæ & principali suæ Sedis ecclesiæ, velut *Et ab ijs censum pen- di ad lumi- naria Ca- thedr. ecclæ* vni capiti & matri omnium, subdita monstraret esse debere, decreuit ut illuc ex reliquis omnibus Ecclesijs per annos singulos census persolueretur, certus scilicet numerus librarum ceræ atque olei, prout illis offerendi facultatem suppetere sciebat. Æquum tamen omnibus eisdem locis debitū imposuit; hoc est, ut ex unoquoque redderetur una ceræ libra, & olei duæ, præter id, quod custodibus præfatæ principalis ecclesiæ dari constituit. Ex quo verè sancta & religiosa intentio beati viri satis appareat, quod non sibi aurum vel argentum, seu quodlibet earum rerum, quæ mundum amantibus pretiosa, ipsi vero, velut cælestia desideranti, omnino erant contempnibilia, coaceruauit; sed ea magis Ecclesiæ dari constituit, quæ ad luminaria iugiter in eâ concinnanda copiam darent. Nam quoniam *ipse*

ipse fuit templum veri luminis, hoc est, Spiritus sancti, etiam corporalis lucis ornatum manufactæ domui Dei noluit unquam deesse.

14. Mansit autem in Episcopatu annos quadraginta & nouem: in quibus fecisse legitur ordinationes nonaginta & sex; ordinasse vero Presbyteros ducentos decem & septem, Diaconos centum septuaginta sex, Subdiaconos nonaginta tres; reliquorum quoque graduum ministros, quantum sacris officijs congruum & sufficiens esse videbat.

*sacerdos mini-
strorum ordi-
nati*

*etiam laicis
seprobatis:*

Luc. 1.6.

Prætereà habuit bonum testimonium etiam ab his, qui foris sunt ita ut hoc quoque specialiter de illo præfata referant scripta, quod studuerit Deo in omnibus dulciter famulari, & in rebus Ecclesiasticis Deo & hominibus bonis oppidò placere. Vnde liquidò patet, sic eum religionis constantiam ante Deum seruasse, ut tamen proximorum oculos non offenderet: sic humano foris placuisse iudicio, ut Diuinis obtutibus non displiceret in occulto. Ita per omnia verus Dei cultor illi meritò Pontifici comparatur, quem sine querela Domino seruuisse Euangelica laudat historia: nisi quod hic tantò præstantioris fuerit sacerdotij Præsul, quantò figuram veritas, quantò legem veterem noua Christi gratia transcendit. Illo denique præsulatu functi, animalium cruores immolabant: huius sacerdotij primus auctor & Pontifex, per proprium sanguinem introiuit semel in sancta,

Ec

Et tamen in officio dispari fuere Pontifices
isti, sanctitate pares, ambo Euangelicâ laude
digni, ambo iusti ante Deum, incedentes in
omnibus mandatis & iustificationibus Do-
mini sine querelâ.

a ms. Corsend, Marsano. Nonnulla horum vicorum
aut oppidorum nomina aliter paulò in 2. Vita expressa.

C A P V T V.

S. LIBORII obitus, sepultura,
miracula.

15. **C**Vm autem Diuinæ Maiestati compla- *morro eoz.*
cuit, post tam diuturna tot annorum *repium*
certamina, victorem hostis antiqui, militem
suum æterno præmio glorificare, anno quin-
quagesimo Episcopatus sui, corporis eum mo-
lestia ita fatigari permisit, ut adesse sibi diem
exitus sui non dubitaret. Qui annus illi verus
extitit Iubilæus, quem in eodem numero an-
num remissionis appellans, vnumquemque in
eo redire ad familiam, & ad possessionem
suam lex Diuina præcipit. Nam & ipse quò Leuit. 25.
minùs se dubitatet ad requiem tendere, post 10.
septem septimanas annorum, ex quo consti-
tutus est super familiam Domini, adhuc in
terrâ positam, ad eam quæ in cælis est, lætus
vocari meruit, ut possideret terram, quam
mansuetis & mitibus Veritas repromisit. *Matth. 5. 4.*

16. Eodem tempore S. Martinus Episco-
pus

S. Martinus pus Turonensem regebat Ecclesiam, vir A.
 Angelico postolicis clarus omnino virtutibus: cui inter
 monitus, vi^o illa, quibus assiduè frui solebat, Angelicæ col-
 locutionis mysteria, etiam hoc ex Diuinâ re-
 uelatione præceptum est, ut ad urbem Ceno-
 manicam pergeret, atque ibidem in infirmi-
 tate positum Dominum visitaret. Vnde anim-
 aduertens, hanc Domini infirmitatem de
 aliquo membrorum suorum intelligendam,
 Matth. 25.
 36. de quibus ipse dicturus est in iudicio, Infir-
 mus fui, & visitaisti me; cœpit illicò festinus
 ad memoratam pergere ciuitatem. Cui cùm
 iam appropinquans, iuxta vineam quamdam
 iter ageret, vidi eminūs in eâ stantem Cleri-
 cum gradu Subdiaconum, & Victurium no-
 mine, operi quidem, b quodcumque ibi agen-
 S. Viatu-
 dum erat, studiosius insudantem, sed nihilo-
 rium illi
 successorum
 pradicit. minùs frequentatione psalmodiæ laudes Do-
 mini decantantem. Hic erat discipulus S. Li-
 borij, atque in ipsâ suæ continentiae mentis-
 que & habitus humilitate, bonæ institutionis
 magistri optimi clarum præbebat indicium.
 Quem intuens S. Martinus, reuelante sibi
 Spiritu sancto hunc esse futurum ibi Episco-
 pum, his eum verbis salutauit, dicens: Ave
 noster Pontifex. Dehinc illi baculum suum
 dedit, atque ita concito gradu, in urbem pro-
 perauit. In quâ inueniens sanctum & verè
 Deo dilectum Præsulem iam in extremis po-
 situm, & cælesti tantum gaudio, quò iturus
 erat, intentum, cum ineffabili ab eodem læti-
 tiâ

tiâ susceptus est. Hic verò necesse est, ut non *p̄ijs colloquijs*
ster sermo deficiat: quia neminem dignè con- *Liborium*
stat posse referre, quām diuina, quām spiritua- *animat*,
lia, quām cælestia fuerint eorum colloquia;
cum quā se exultatione mutuò viderint, quo
mentis affectu suam ad tempus separationem
ferre potuerint. Erant enim ambo Christi mi-
litum excellentissimi duces, ambo crebris de
diabolo triumphis gloriosi. Sed alteri iam
reddendum erat præmium sempiternum, al-
teri aliquamdiu differendum, & adhuc pro
castris Dei fuerat decertandum.

17. Igitur B.Liborius, præsente sibi tanto & sancte
consolatore, suarumque exequiarum prouisi- *mortuum*
flore, & decimo Kalendarum Augustarum die *sepelit*:
lætus migravit ad Dominum. Cuius venera-
bile corpus S.Martinus cum honore congruo
ad ecclesiam extra urbem positam duci, & in
eâ sepeliri fecit: quam primus eiusdem Sedis
Antistes, Julianus nomine, construxit, & in
honore d duodecim Apostolorum dedicauit.
Decebat enim, ut qui Apostolorum in terrâ
successor, & in cælis esse meruit consors, in
eorum quoque ecclesiâ communi cum illis
memoriâ coleretur. Sequenti verò die vir Dei
Martinus populum omnem, qui ad tanti viri
exequias copiosus nimis & innumerabilis
conuenerat, & internum amorem erga Pa-
storem suum largissimis lacrymarum fonti-
bus testabatur, in ecclesiam conuocatis, san-
ctæ admonitionibus doctrinæ consolabatur,

F

etisque

§2 VITA S. LIBORII PATRONI

Anno // eisque præfatum Victurium ordinavit Episcopum.

Liborius post mortem miraculus illustratur. 18. Tradunt quoque litteræ superiùs memoratæ, multa quidem S. Liborium in hac vitâ fecisse miracula, sed multò plura postmodùm ad sepulcrum eius fuisse diuinitus ostensa, licet ob multitudinem suam nominatim expressa non sint. Quod nos facile credimus ex his, quæ oculis nostris videre meruimus, postquam ad nos sacrum translatum est corpus, sicut adiuuante Domino, sequens huius operis textus enarrabit. Nam quoniam ipse verè fuit organum Spiritus sancti, per ipsius nunc operationem ante eius reuerenda pignora virtutum signa saepius ostenduntur; curationes scilicet debilium, salutes languentium, expulsiones immundorum spirituum; præstante ipsius gratiâ, qui est fons & origo bonorum omnium, Deus & Dominus noster, qui in Trinitate inseparabili viuit & regnat per infinita secula seculorum, Amen.

a Alij Victorem, Victurum, Victorium vocant.
Colitur 25. Augusti, uti testatur Coruasserius; at 1. Septemb. alter Victorius, eius filius.

b ms. Bod. addit, vinearum. Non satis eam interpolationem patiuntur sequentia verba, quodcumque ibi agendum erat: etsi ex S. Victorij Vitâ constet, cum operantem in vineâ repertum à S. Martino.

c Dissentiunt alia eius Acta, ut supra §. I. diximus. colitur saltem hoc die.

d Vita primo loco relata, solum habet Petri & Pauli.

L I-

LIBER SECUNDVS.

TRANSLATIO

S. LIBORII.

CAPV T I.

*Scriptionis caufa. Episcopatus primi
in Saxoniā.*

i.  Escriptis superiori libello *Bisonis Ep.*
vitâ & transitu pretiosissimi *iussu scriptæ*
Confessoris Christi atque *hæc histo-*
Pontificis Liborij, nunc se-
cundūm tuam, a Biso, Præ-
fulegregie, iuffioneim, ad exponendam seriem
Translationis eius sacratissimi corporis, &
ostensa per eius merita virtutum b insignia,
pro concessâ diuinitus facultate, stylum men-
temque conuertimus; excitante studium no-
strum pensatione sollicitâ, qualiter vobis ob-
temperare, quantum deferre debeamus, ma-
xime cùm eorum officij dignitate sublima-
tos, quibus Diuinâ voce dicitur, (*Qui vos Luc.10.6.*)
spernit, me spernit, non dubitetur, vos mini-
mè sine Dei contemptu posse contemni.
Proinde ad retexendas cùm laude debitâ vir-
tutum operationes, per quas sancti Spiritus

F 2

gratia

84 VITA S. LIBORII PATRONI

gratia solet electorum merita declarare, eo,
quo te præcipiente huic operi insistere de-
buimus, nullum opportunius tempus occur-

*circa Pente-
costen in-
choasa.*

beati

rit: appropinquante videcet sacrâ solennitate aduentus eiusdem Spiritus Paracliti, qui B. Liborij & in hac vitâ manentis inhabitator apparuit, & nunc ipsius sanctitatis pet miracula index & glorificator existit. Cuius nos ad suscepsum opus auxilium haudquaquam inefficacibus votis inuocaturos speramus, præsertim cum non aliud, quam quod ipse adueniens, mentibus, quas repleuit, ad proferrendum inspirauit, Dei scilicet magnalia loqui, & ipsum mirabilem in Sanctis suis monstrare conemur. Sed antequam ad rei gestæ ordinem veniamus, caussam Translationis memoratæ, atque exordium constructionis ecclesiæ, quæ tanto cælitus illustrari meruit thesauro, referre breuiter congruum arbitramur.

*Carolus
Magnus,
Saxoniâ
domitâ.*

2. Igitur vbi primùm gloriose memoriae Carolus Imperator, concertatione longissimâ, & varijs præliorum euentibus, cum gente Saxonum exactis, illos ferro edomitos Christi fidem suscipere fecit, suoque addidit imperio, clarum illicò dedit indicium, quâ fretus intentione, tam diuturnum laborem infatigabilis ferre potuerit. Siquidem, ut in libello vitae ipsius legitur, triginta & tribus continuis annis bellum cum eadem gente gessit. Quâ tandem partim armis, partim liberali-

gate

eate, per quam maximè Primorum eius animos libi deuinxerat, superatâ, totum exinde suum ad hoc contulit studium, ut pro tantarum saluatione animarum populi, post tot secula cultum dæmonum relinquens, fructum sui laboris ex Dei remuneratione consequeretur. Et ut se magis Christianæ religionis, quam regni sui dilatandi caussâ, tantæ rei difficultatem aggressum ostenderet, ecclesiastis ^{tempora multa extruit:} per omnem regionem illam, ad quas ruditis in fide populus confluere doceretur, & sacramentis cælestibus initiari consuesceret, sub quantâ potuit celeritate construi fecit: atque parochias diligent ratione suis quaque terminis seruandas designans, quia à ciuitates, in quibus more antiquo Sedes Episcopales constituerentur, illi penitus prouinciae deerant; loca tamen ad hoc, quæ & naturali quadam excellentiâ & populi frequentiâ præ ceteris opportuna videbantur, elegit.

3. Tum verò vix reperiebantur, qui barbaræ & semipaganæ nationi Præsules ordinarentur. Cuius interdum ad perfidiam relabentis cohabitatio, nulli Clericorum tuta videbatur: cui Ecclesiasticum officium, & quid quid ad rerum Diuinarum pertinet cultum, non solum deerat, verùm ignotum omnimodo erat. Quocircà vnamquamque prædictarum pontificalium Sedium cum suâ diœcesi singulis aliarum regni sui Ecclesiarum Præsulibus commendauit, qui & ipsi, quoties sibi

*quos alia-
rum Se-
dium Epi-
scopus com-
mittit:*

vacaret, ad instituendam confirmandamque in sacrâ religione plebem, eò pergerent, & ex Clero suo personas probabiles cuiuscumque ordinis, cum diuerso rerum Ecclesiasticarum apparatu, ibidem mansuros iugiter destina- rent. Et hoc tamdiu, donec annuente Domi- no salutaris illic fidei doctrina conualesceret, & ita Diuini usus ministerij proueheretur, ut proprij quoque in singulis parochijs dignè & fiducialiter possent manere Pontifices.

Biso Ep.
Paderborn.
4.

a Biso quando sederit, suprà indicaimus §. 2. tem- pore nimirùm Ioannis VIII. Pape, ut scribit Gobelinus Persona. Cosmodromij etate 6. cap 45. Sedit verò Ioan- nes à 14. Decemb. an. 872. ad 15. Decemb. 882. Bisò autem rexit ipsam Ecclesiam Paderfontanam, in- quirit idem, annis XXIII. Hic à Carolo Crasso Imp. ut refertur in Vitâ S Meinverci Ep. Paderborn. quam v. Junij dabimus, an. 885. electionem Episcoporum inter eiusdem & ab eiusdem Ecclesiæ filijs facien- dam impetravit. Idem corpus S. Meinulphi, ut dice- mus ad eius Vitam v. Octob. transstulit temporibus Ar- nulphi Imp. qui rerum potitus est à fine anni 887. ad an. 900.

b ms. Corsend. Signa.

c Dedimus 28. Ianuarij S. Caroli Magni Vitam per Eginardum. Tomo 2. Scriptorum Francic. Andrea Duchesniij in varijs Annalibus Francorum pleniùs re- feruntur eius res gestæ.

d Gobelinus cap. 38. etat. 6. in totâ patriâ illâ non erat locus muris ciuctus; paucis castris exceptis.

CA-

C A P V T I I.

*Primus Paderbornensis Episcopus
B.Hathumarus.*

4. Inter omnia verò loca , constituendis Paderbor-
principalibus Ecclesijs in hac, de quâ lo- na, sita a-
quimur, prouinciâ designata a Paderbornen- mæno loco,
sis Sedes speciali quadam dignitate præcellit, | b
habens amplissimam circumquaque plani-
tiem, nemorum tamen frequenti & variâ di-
uersitate sufficenter ornatam , agros yberes,
& frugum omnium feracissimos. Cui adiacet
à laeuâ in ipso mænium prospectu silua, mul-
tis passuum millibus in longum latumque
diffusa, adeò pecorum & armatorum pascuis,
apiumque seruandarum usui opportuna; vt illi
non dissimilis videatur regioni , quam sacræ
litteræ vocant Terram lacte & melle manan- fertili,
tem. Accedit ad ornementum loci salubri-
morum fontium , intra ipsum oppidum in
vnus pariter alueum confluentium, incom-
parabilis tam species,quam numerositas ; in
tantum , vt eorum b latitudini & amœnitati
similes esse alibi minimè compertum habe-
mus. Nec desunt hinc inde & alia flumina,
vtilitatum , quæ ab his petuntur , largissima.
Aér ibidem & aura placidior, & licet in fri- salubris
gido terrarum tractu, naturali gratiâ tempe-
rator, citius quam in alijs illarum regionum

88 VITA S. LIBORII PATRONI

partibus, maturitatem cunctorum fructuum
afferre consuevit. Prætereà pagus ipse, vt &
nostra memoria, & veterum relatio testatur,
viris omni nobilitate generis animique sem-
per insignibus abundabat: vt non esset du-
biu[m], quin patria ciuibus, & ciues patriæ
congruerent, ac sibi utraque vicissim orna-
mento forent. Et hæc quidem pauca de plu-
ribus, hinc à nobis non ex superfluo dicta
animaduertet, qui Christianissimi Principis
ex hoc quoque in Deum devotionem com-
probabit, quod ea, quæ ex tantâ locorum
conuentum
habet: amoenitate iure belli acquisita, sub suâ potuit
tenere ditione, Diuino magis seruitio, quâ in
suis deputauerit v[er]sibus. Tamen interdum, pro
varijs gentis eiusdem utilitatibus generale
e placitum habiturus, illic populi conuentum
fieri iussit, & hac ibidem caussâ aliquamdiu
solebat immorari.

S. Leonē III.
Papam ibi
excipit.

5. Nam & vir sanctissimus & verè Apo-
stolicus Papa Sedis Romanæ, d[icitu]r Leo nomine,
iniusta ciuium odia perpessus, illic eum adiit,
pro sedandis contra se ortis simultatibus, im-
perialem opem quæsiturus. A quo cum in-
genti vt par erat, honore suscep[t]us, religiosum
eius ac salutare Christianitatis dilatandæ stu-
dium nobiliter inchqatum, Apostolicâ aucto-
ritate firmauit, atque in Ecclesiâ tunc ibidem
nouiter constructâ e quoddam altare conse-
crans, adorandas in eo reliquias Protomarty-
ris Stephani, quas secum Româ deculerat,

a quo ara
dicata, collo-
cata reli-
quia

e

collo-

collocauit ; fiducialiter id Principi promittens, quod oratorium illud, tanti Martyris patrocinio munitum, non ulterius passurum foret iniuriam, quam, ipso referente, prius ei contigisse cognovit ; ut videlicet ob incolarum loci perfidiam & odium in religionem Christianam aliquoties figni traderetur. Et ob hanc maximè caussam eisdem reliquias ibi rogatu Imperatoris recondidit, non sine effectu congruo fiduciæ sponsonisque suæ, cum nihil tale postmodùm illic perpetratum esse certissimum sit,

ad fidei securitatem:

f

6. Hoc igitur ordine Paderbornensis Ecclesiæ Sedes episcopal tam Imperatoriâ sanctione, quam Apostolicæ benedictionis auctoritate primitus constituta, ob caussam superius memoratam commendata fuit aliquamdiu tuitioni Præsulum cuiusdam castelli orientalis g Franciæ, quod sermone barbaro Wirtziburg appellatur. Sub quorum regimine status rerum ipsius parunt proficere potuit : quippe cum loca ipsa longâ inter se terrarum intercedine distarent, & Præfatos Præsules raro hanc nouellam Ecclesiam inuisere, vel occupatio permitteret, vel commoditas suaderet. Neque enim ibi deerant negotia, quibus procurandis insisterent, neque huc pergendi laborem paruum faciebat itineris longitudo. Ibi res necessariæ sufficienes erant & ordinatæ: hic & tenues, & cum difficultate nouiter ordinadæ.

*eum Episco-
patū VVire-
zeburgensis
regit;*

g

F 5

7. Quo-

90 VITA S. LIBORII PATRONI

7. Quocircà meritò utilius visum est, hanc Sedem suum per se habere Antistitem, qui non alibi occupatus, hic tantum agendis rebus præsens insudaret. Erat tunc temporis in Clero Wirtziburgensi vir magnæ humilitatis atque modestiæ, i Hathumarus nomine, de

dein Hathumarus, Episc. Saxo, olim obses datus Carolo, gente nostrâ, hoc est, Saxonica, oriundus: qui cùm adhuc puer esset, belli tempore Carolo Imperatori obses datus, illic seruari iussus est.

Vbi postea tonsuratus, ac studijs litterarum traditus, in virum perfectum moribus & eruditio-

nate profecit. Hic ex præcepto Principiis

primus est Paderbornensis Ecclesiæ ordinatus Episcopus. Post cuius ordinationem pau-

cis annis transactis, k idem gloriosissimus Princeps ab hac luce migravit. Cuius incom-

parabilem in omni virtutum gloriâ præstan-

tiam licet libellus de vitâ eius conscriptus

plenissimè referat, nos tamen hic aliquid de

eo vel breuiter dicere, ipsius in nos beneficij

magnitudo suadet. Quem arbitror nostrum

iure Apostolum nominari: quibus ut ianuam

fidei aperiret, ferreâ quodammodo linguâ

prædicauit. Qui cùm toties victoriâ potitus,

quoties in procinctu positus, multas sibi gen-

tes, multa regna subiecit; constat tamen eum

gloriosissimè etiam de diabolo triumphasse,

cui tot animarum millia, priùs sub eius tyran-

nide captiua, in conuersione nostræ gentis

eripuit, & Christo Domino acquisiuit. A quo

illum recipere præmium & confidimus, &

verè Apo-

stolo Saxo-

nus:

magnitudo suadet. Quem arbitror nostrum

iure Apostolum nominari: quibus ut ianuam

fidei aperiret, ferreâ quodammodo linguâ

prædicauit. Qui cùm toties victoriâ potitus,

quoties in procinctu positus, multas sibi gen-

tes, multa regna subiecit; constat tamen eum

gloriosissimè etiam de diabolo triumphasse,

cui tot animarum millia, priùs sub eius tyran-

nide captiua, in conuersione nostræ gentis

eripuit, & Christo Domino acquisiuit. A quo

illum recipere præmium & confidimus, &

opta-

optamus, ut fruatur in cælis Apostolorum
consortio, quorum functus est in terris of-
ficio.

a ms. Corsendoncanum, Padaburnensis. Variè hu-
ius urbis nomen effertur ab antiquis Scriptoribus: Pa-
tresbruna, & Patresbrunnas appellatur in Ioannu
Tili⁹ annalibus minoribus; in auctioribus Patresbrun-
na, & Patrisbrunno: in fragmento annalium Alex.
Petauij, Padresbrunnon, & Padresburnon: in Anna-
libus Loiselij Paderbrunnen (ut in alijs quibus-
dam) & Padabrunno: in Vitâ Caroli Magni per in-
certum, Paderburnen, & Paderbu: in eiusdem
Vitâ per monachum Egolismensem, Paderbrunnam, &
Padabruno: in Poëtâ Saxone Pathalbrunnon: apud
Eginhardum, Padabruna: in Vitâ Ludouici Pij, Pa-
trisbruna: in historiâ constructionis nouæ Corbeia, Pa-
therbruna: in Annal. Fuldensi Padabrunno, & Padra-
prunno: in historiâ Translationis S. Viti Patherbron-
na. Gobelinus cap. 38. nominis etymon exponit. Oritur
enim isthic fluuius, qui Pader dicitur, ex tribus fonti-
bus, quorum singuli Pader appellantur. Quare idem
Gobelinus suprà. Ecclesiam Paderfontanam dixit.
Born namq; aut brunn, siue borne, & brunne Teuto-
nicè fontem significat. Quidam fluuiio huic nomen in-
ductum à
didisse Carolum Magnum aiunt à Pado Italia fluuiio, fonte
ex tribus itidem fontibus, in unum coëuntibus atueum,
orto. Refellitur id ex S. Ludgero, qui in Vitâ S. Svvi-
berti I. Martij, inter Saxones Verdense monasterium
an. DCCLXXVIII. populatos recenset nefarium quem-
dam Ogellum Oosterbach de Paderborne: atque
ex Poëtâ Saxone infrà citando, qui vetustum fuisse
urbis nomen significat, ergo & fluuij, à quo urbi no-
men. Alij à Romanis, cùm ijs in locis castra haberent,
factum volunt, ob eamdem Padi similitudinem. Quod
ut absque veteri auctore affirmare mihi non est ani-
mus, ita consentaneum rationi usq; non inficior; &
accolarum traditione celebratum. Vix xv. stadia pro-
gressus

92 VITA S. LIBORII PATRONI

gressus Pader, ad Nichuis arcem à Theodorico
Furstenbergio Ep. constructam & oppidulum, Lippæ
misicitur, sat tenui riuo, alteriq; ac deinceps Lippæ,
sive Lippiæ, aut Lupiæ, seu Luppiæ retinet nomen,
donec in Rhenum sese ad Wesaliam oppidum exoneret.
Locum in quo Lippa ac Pader coëunt, vel ipsam (ve
tunc erat) Paderbornam, ita describit Auctor carminis
de Leonis III. Pape ad Carolum aduentu:

Patræ, sive
Padifl.

Est locus insignis, quo Patra & Lippa fluentant,
Altus & in nudo campo iacet, vndique largo
Vestitus spatio: celso de colle videri
Namque potest legio omnis & hinc exercitus
omnis,

Castra Ducum, & Comitum, radiantiaque armæ
virorum.

Qui hēc Patra, in Vitâ S. Adelardi per S. Paschasium
Ratbertum 2. Ianuar. cap. 16. nu. 66. Pater appellatur.
ira enim describitur Corbie Saxonice situs: Est autem
locus, pergentibus ad ortum solis de Fonte Patris,
situs supra littus Wifiræ, &c. Franciscus Irenicus l. 12.
Germanica Exegeseos Padam vocat.

eoq; multi-
plice:

b Tres principi Padæ, sive Padi, aut Padulæ, fon-
tes; qui è rupe omnes prorumpunt inera ipsam urbem:
intra quam in unū alueum coëunt, ac fluvium profun-
dum latumq; conficiunt, qui aestate frigidissimus, hie-
men vecumque calidus est. Trium horum fontium unus
ita profundus est, Gobelino teste, ut ab aqua superficie
ad fundum pedes esse 98. testari sint qui explorarant.
Alij preterea fontes in eadem ipsâ urbe orti, aquis suis
Padum augent: ex unius, qui maximè Australis, aquâ
prefari coquitur cereuista, qua etiam vim medicam
habere contra calculum creditur.

Fontes eo
eractu acci-
diti;

Extra urbem alijs fontes ac riuui, sanè memorandi:
nam prater tres circa Driburgum, aliumq; propè Lu-
dam oppidum, acidulos ac medicatos fontes, à Matthao
Meriano in Topographiâ VVestphalia relatos, maximè
mirabilis qui Bolderborna, sive Bulterborna appellatur,
iuxta Aldeubekam pagum. His agsum quen-
dam

dammarino similem patitur : nam xxiv. horarum spa- Bulderbora
zio bis aquas suas resorbet, ac post sex horas denuò eru- na fons re-
derat ingenti cum strepitu, unde & nomen accepit : Bol- sorbetur.
deren enim, siue buldereu, Teutonicè, cum strepitu
blaterare aut detonare dicimus. Tam copiosum tamen
Bolderborna riuum profundit, ut is non longè à sua ^{vii} & riuum
scaturigine ternas molarum rotas circumagat. Sed ali- ex eo ortus,
quanto spatio progressus in terram penitus subsidit. Idem
alijs diobus riui eodem tractu accidit : quorum alter
Svvanicum pagum preterfluit, haud procul Pader-
borna, ac paullò pòst terrâ se condit: alter inter oppidum
Lechtenauiam, ac pagum Steinem. Retulit mihi Io-
annes Grothusius noster, se, cùm isthac iter ficeret,
animaduertisse q̄ mergi fluuium illum, proprius acce- & alij dños
fisse, & silicibus glareaque submotis, nullum perspexisse,
quo absorberetur, foramen ; sed aure ad terram admo-
rā, unā cum socio, audisse ingentem strepitum ac colli-
sionem velut in cellam delabentium aquarum. An hi
amnes Paderborna, aut alibi, denuò prorumpant, ut
tradi ab aliquibus scribit Merianus, frustrā quarā,
quod latere voluit Auctor nature.

c Placitum passim pro conuentu iudicali, siue con- Placitum,
uenitus loco, usurpatur in media etatis scriptoribus. siue conuen-
Exempla plura repertis in Glossario Frid. Lindenbrogiij tus, Fran-
ad Codicem legum antiquarum. De conuentu ad Pa- corum ad
derbornam, quod huc facit, ita scribit Poëta Saxo lib. 1. Paderbor-
annal. ad an. 777. nam, an.

Conuentum placiti generali habere 777.

Cum Dueibus se velle suis denuntiat illic.

Tanto concilio locus est electus agendo,

Quem Pathalbrunnon vocant, quo non habet
ipsa

Gens alium naturali plus nobilitate

Insignem, qui præcipue redimitus abundat

Fontibus, & nitidis & pluribus, & trahit inde

Barbaricæ nomen linguae sermone veterum.

Meminere magni placiti isthie eo anno habiti Anna-
les Tisliani, quod Loiseliani & monachus Egolismensis
synoduna

94 VITA S. LIBORII PATRONI
synodum publicam appellant; Vita Caroli magni per
incertum, synodum, & concilium publicum; Egi-
nardus generalem populi conuentum. Iterum an.
785. placitum habuit ad Padesbrunnon cum Fran-
cis & Saxonibus, ut habeat Fragmentum annal. Alex.
Petavi, siue, ut Loiseliani, synodum publicum cele-
brauit; aut, ut Vita eius per incertum, concilium pu-
blicum tenuit. De secundo hoc conuentu agunt cum
Eginardo ceteri Scriptores. De tertio, an. 799. mox di-
cemus. Ibidem Ludouicus Pius an. 815. conuentum
habuit, ut idem Eginardus auctor est, & alij infrà. Py
quoque filius Ludouicus Rex Germanie, ut habent
Annales Fuldenses, an. 845. in Saxonia apud Padra-
prunno generale placitum habuit.

d Leo III. is fuit, de quo ad XII. Iunij. Extat de eius
ad Carolum aduentu poëma elegans tom. 2. Francicor.
scriptor. Quâ de re ceteri quoque agunt annales, qui &
memorant sanctissimo Pontifici manus à populo Roma-
no injectas in publicâ supplicatione, oculos erutos, lin-
guamq; excisam; sed virtute Diuinâ & hanc & illos
ei restitutos.

Indulgen- e Gobelinus addit: Visitantibus eamdem capel-
tias coñcedit lam in anniversario dedicationis ipsius, qui est VIII.
Paderbornæ. Decembris, de benignitate Sedis Apostolicæ ma-
gnas Indulgentias concessit. Extat etiamnum in cry-
ptâ illud altare S. Stephani. De eo Vita S. Meinuverci
Ep Paderborn. §. Iunij cap. 1. in cryptâ ibidem nouiter
constructâ, quoddam altare consecrans, Leo Papa,
adorandas in eo Protomartyris Stephani reliquias,
quas Româ secum attulerat, in priuilegium Apo-
stolicæ consecrationis collocauit.

Paderbornæ f Non planè ab omni incendio immunem fore Pa-
derbornensem Ecclesiam vaticinatur sanctus Pontifex,
combusta sed quod incolarum loci perfidia, odiumq; in religionem
Christianam, excitasset. Alioquin, ut in citatâ S. Mein-
uverci Vitâ dicitur, & supra §. 5. retulimus, anno Do-
minicæ Incarnationis millesimo, ordinationis Re-
thardi Ep. nonodecimo, regni Ottonis III. decimo-
septi-

an. 785.

799.

815.

845.

S. Leo III.
Papa

combusta
an. 1000.

septimo, Imperij quarto, Indict. XIII. ciuitas Patherbrunnensis primum incendio vastatur, nobileque principalis Ecclesiae monasterium, præcipui operis & decoris, à Carolo Magno fundatum, à beatæ verò memoriæ Badurado Episcopo consummatum, & XIV. Calendas Nouembris dedicatum, cum libris, priuilegijs plenarijs, alijsque Ecclesiae ornamentiis propemodum conflagravit. Ex ijs quæ ibidem subiiciuntur, pater, vel omissum aliquid esse, vel vocem propemodum, pro penitus accipiendam: quare à Gobelino, qui cap. 50. etatis 6. idem incendium ijsdem ferè verbis commemorat, omissa est: uti & à Krantzio Metropolis lib. 3. cap. 40. Iterum conflagravit ciuitas cum ecclesiâ an. MCXXXI. uti refert Krantzius lib. 6. & an. 1137 cap 10 & Gobelinus cap. 58. qui cap. sequenti tradit à Bernardo Ep. restauratam, & duodecimo post anno, Christi MCXLIII dedicatam.

g Franconia nunc vulgo dicitur, Teutonicè, Frankenlandt, id est, Francorum regio.

h Ita & Annales Fulenses ad an. 746. Eginardus an. 793. Celebrauit Carolus Natalem Domini apud S. Kilianum in Wirtziburgo iuxta Mœnum fluuim. Monachus Egolismensis ad eundem annum, Wirtziburg vocat, ms. Bodecen. Wirzeburg. Postiores Herbipolim dixeré, parùm idoneâ interpretabitione, ex Latinâ Græcâque voce nomen conflantes. unde unde dicta. Gunterus lib. 5. Ligurini:

Conueniunt, vrbemque petunt, cui nomen ab herbis

'Esse putant, linguæ vulgaris origine tractum. Burg quidem castrum, siue urbem munitam significat sed vvirtz, siue vvurtz, non herbam, sed radicem. unde Iacobus Spigelius in Scholijs ad Ligurinum, fatetur satis dure Herbipolim dici, pro VVirtzburgo. Plura de eius etymologiâ Irenicus lib. II. Germanie Exegesos: sed quod ait à Ptolomeo Arctanum dici; nescio ubi legit; nam in Ptolomeo nusquam id nomen habetur.

i Quia sepius obsides à Saxonibus accepit Carolus,

scit;

96 VITA S. LIBORII PATRONI

sciri certò non potest, quo anno traditus ei sit B. Hathumarus, quem Cratopolius alijq. S. Hadumarium appellant; Kranzzius & alij Harimarium. Constat sub S. Burchardo, primo Ep. Herbipolensi, litteris & pietate eruditum.

k Cùm obierit Carolus 28. Ianuarij an. 814. manifestum est errasse eos, qui anno Christi 795. ordinatum Hathumarum 804. mortuum scripsere, ut ad sequens caput norabimus.

C A P V T III.

*Episcopus II. Baduradus. Reliquiae petiteæ
Cenomanis.*

*II. Ep. Ba-
duradus,
nobilis, e-
gregius:*

*is templa
struit &
ornat:*

8. **V**T verò ad propositum redeamus; de-
functo Carolo, a Hathumaro quo-
que Episcopo non longo post tempore ab
hac mortalitate ad perennem, vt credimus,
vitam assumpto, successit ei vir egregius, no-
mine Baduradus, qui & ipse ex hac regione
nobili ortus prosapiā, ex eiusdem Ecclesiæ
Clero b electus est. Qui præclaræ morum no-
bilitatis, magnanimitatis & industriæ meri-
to, familiaritatem regiam c intimè consecu-
tus, tantæ dignitatis locum promeruit, vt ei
non minor facultas, quam voluntas amplifi-
candæ, prouehendæ, atque adornandæ Ec-
clesiæ sibi commissæ, suppetere videretur.
Tunc verò, tamquam ad hoc sibi datam di-
uinitus excellentiam animaduerteret; nihil
sui laboris studij, que subtraxit ab acquirendis
ac procurandis omnibus, quæ ibidem ad Di-

uinæ

uinæ laudis augmentum, ad vtilitatem Chri-
stiani populi nouerat pertinere. Hæc illi cura
prima imminebat, ecclesias per omnem paro-
chiam suam sub celeritate construere: prin-
cipalem verò basilicam ingenti decore &
grandi opere extollere, res omnes ad eam
pertinentes modis varijs adornare, augmen-
tare Clerum, disciplinam monasterialem in-
stituere, pueros tam nobiles, quam inferioris gen-
conditionis, in scholam congregatos, in Di-
uinæ legis eruditioне nutritе. Quod eius lau- Clerum an-
dabile stadium ita felix profectus comitaba- pueros in-
tur, ut verè illum ad hoc à Deo præsignatum, strui curat;
& rudimentis eius loci cælitus conceſsum di-
cere valeamus.

9. Quia verò rudis adhuc in fide popu- Reliquias
lus, & maximè plebeium vulgus, difficile po- SS. procul-
terat ab errore gentili perfectè diuelli, laten- randas cen-
ter ad auitas quasdam superstitiones colen- set;
das sese conuertens; intellexit vir magnæ pru-
dentiae, quod si præcipui alicuius Sancti illic
corpus allatum, miraculorum, ut fieri solet,
ostensione & gratiâ sanitatum suadente, mul-
titudo plebis inciperet venerari, & ad eius
patrocinia confluere consuesceret, nullâ re
eam facilius ab infidelitate posse renocari;
præsertim cum verbis doctorum de Diuinâ
virtute non credentes, tamen his, quæ oculis
vidarent, quæ beneficiorum vtilitate senti-
rent, fidem derogare non possent; præterea
cunctis fidelibus ibidem manentibus, vel eò

G conue-

conuenientibus magnæ hoc apud Deum intercessionis solatium, maximam eidem loco tuitionem & gloriam collaturum fore non dubitans, ad id obtainendum sedulæ cogitationis curam intendebat. Et quoniam à Deo, qui est fons bonitatis, quidquid optatur boni, & maximè rem tantam nouerat expetendam, indicto ieiunio, & celebratâ supplicatione publicâ, cum omnibus sibi commissis, ab eius clementiâ demonstrari sibimet postulauit, quoniam ordine pro adipiscendâ re desideratâ deberet insistere.

10. Vnde fidem eius benignè respiciens,
diuinitus dignatus est ei reuelare, quod ad Cenomaniacum urbem Galliæ rem diu optatam petitum ab Episcopo loci mittere deberet: ibi dandum votis eius effectum prosperum fore. Ex hac reuelatione indubiatâ spe animatus, accelerare negotium studuit. Episcopus qui prefatam urbem eo regebat tempore, Aldricus nomine fuit. Ad hunc ergo cum consensu & præcepto Cæsaris Ludouici, nuntios destinandos elegit, ex Clero quidem suo probabiles personas, & in sacris ordinibus religiosam vitam ducentes: necnon & quosdam laicos nobiles, quorum fidem & industriam ad tale opus idoneam nouerat. Clericorum vero, quibus id negotij commendatum est, præcipius erat quidam Presbyter, Ido cognomine, qui omnem suæ profectionis historiam, & signa, quæ in eâ diuinitus ostensa perspexerat, partim

*probante
Ludouico
Pio Imp. eò
legatos mit-
tit:*

CALCVLO LABORANTIVM. 99
partim viuâ voce intimata, partim litteris
breuiter annotata, ad nostram fecit notitiam
peruenire.

a Vndebat B. Hathumaris adhuc an. 815 quo anno B. Hathu-
Adelardus, S. Adelardi Abbatis Corbeiensis tunc exu- marus quā-
lantis vicarius, Ludouicum Pium, qui tunc habebat do mortuus.
placitum in Saxonâ, in loco qui dicitur Paier-
brunna, rogauit, ut monasterium in eâ prouinciâ con-
strui iubet. Quod cum p̄issimus Princeps benignè
suscepisset, placuit accertere Episcopum, nomine
Hathumarum, ad cuius diœcесim pertinebat locus,
vbi construendum erat monasterium, ut cum eius
fieret imperio & voluntate. Ita libellus de constru-
ctione nouâ Corbeia, atque historia Translationis S. Vi-
ti, quam 15. Iunij dabimus. Fallitur ergo scriptor vita
S. Meinverci, qui B. Hathumarum anno Christi
804. sui Episcopatus 9 deceſſisse afferit. Quem temere
sequuntur Gobelinus cap. 38. & 40. Krantzius Metrop.
lib. 1. cap. 11. & 16. Cratopolius de SS. Germania, Brus-
chius in Catal. Epp.

b Hunc quoque, ut decessorem, inter obsides Herbi- Baduradus
polim translatum, ait Krantzius lib. 1. Metrop. cap. 16. II Ep. Pa-
ac Bruschius. Alij Baderatum & Baduratum vocant, derborn.
alij Baradarum, Canisius Baduranum, Rolevinckius
Badueradum, Cratopolius Balduinum. Hic esse vide-
tur, quem Theganus Baradadum, Episcopum Saxo-
nicum appellat, aitq; cum alijs Principibus à Ludoui-
co ad Lotharium filium an. 834. missum, præcepisse vir egr-
ei sub edicto omnipotentis Dei & Sanctorum eius, gius.
ut alienaret se à societate impiorum seductorum
eius, &c. Idem indubie est, qui in concilio ad Theodo-
nis-villam an. 835. habito pro depositione Ebonis, &
Ludouici Imp. reconciliatione, Baradarus appellatur.

d Colitur S. Aldricus Cenomanensis Episcopus 7. Ia-
nuarij: ad quem diem illius Vitam dedimus ex Gallu &
Petri Vielli Latinè redditam. Pleniorē nuper, sed Gal-
licè quoque, edidit Antonius Coruasserius.

C A P V T I V.

*Miracula facta dum eleuatur S. LIBO-
R II corpus.*

S. Aldricus Ep. Cenom. addicit corpus S. Liborij:

11. **I**gitur anno Dominicæ Incarnationis octingentesimo trigesimo sexto, Indictione xiiij. cùm præfatus Ludouicus tertium & vigesimum a in imperio annum ageret, Legati Paderbornenses, de Saxoniâ profecti, ad urbem Cenomanicam b quinto Kalendârum Maiarum die venere: insinuantesque Episcopo caussam, pro quâ missi fuerant, benignè ab eo suscepiti, Dei nutu, ut credimus, sine morâ petita impetravuerunt. Sequenti namque die cōuocans omnem Clerum, præsente suo quoque Coëpiscopo, Dauid nomine, tractare cum eis diligenter cœpit, qualiter Missorum, de tam longinquâ regione evenientium, religiosis precibus decenter in hoc posset annuere, vt Sancti alicuius integros, vt petebant, artus aëcipere mererentur. Erat ibidem sanctorum corporum magna copia: inter quæ S. Liborij quondam Præsulis eiusdem urbis præcipue glorificatum miraculis habebatur insigne. Quod cùm Episcopus præfatis nuntijs dare disponeret, reniti primò cœpere plurimi, dicentes se illis pignoribus pretiosius nihil habere.

12. Tandem vix omnium impetrato consensu,

sensu, assumptis secum Sacerdotibus & cuius-
 cumque gradus Clericis, sacri ministerij ve- *ieumi ad*
 stibus ornatis, Missos quoque, qui sanctos ar- *ecclesiam*
 tus accepturi erant, adesse præcipiens, proces- *conueniente*
 sit ex urbe ad ecclesiam, in quâ sacratissimum
 B. Liborij corpus digno cum honore condi-
 tum habebatur. Erat autem eadem ecclesia
 iuxta ciuitatem posita, & in honore *c* duode-
 cim Apostolorum dedicata, quam primus
 eiusdem Sedis Presul, nomine *d* Julianus, con-
 didisse fertur. Ad hanc itaque memoratus
 Episcopus, denuntiato priùs *ieiunio*, cum sa-
 cro illo comitatu humiliter ac deuotè, vt ad
 tale opus decebat, perrexit, vicissim psalmos,
 litanias, hymnosque decantans. In quam cùm
 ipse & plures secum, sacros artus de Mauso-
 leis levaturi, conuenissent, (mirum dictu) sen-
 sere cuncti inæstimabilis odoris suavitate to-
 tam domum repente completam. Qui dissili- *suavis odos*
 milis odoramentis omnibus, quæ in terris vel *diuinitus*
 naturâ vel arte sunt, clarum cælestis cuius-
 dam præsentia dedit indicium. Ita enim om-
 nium, qui aderant, mentes magis quam cor-
 pora ineffabili iucunditate immutauerat, vt
 velut in ecstasi positi, & aliarum rerum obliti,
 tantum ibi manendi delectione teneren-
 tur. Nec dubium, quin ipse tunc fuerit in me-
 dio multorum fidelium, in suo nomine con-
 congregatorum, qui paucis quondam discipulis
 tantam suæ visionis dulcedinem præbuit, vt
 primus eorum diceret; Dominus, bonum est Matthæ.

102 VITA S. LIBORII PATRONI

pos h̄c esse. Nec erat incongruum, vt eorum
meritis odoris fragrantia testimonium daret,

2. Cor. 2.15. cum quibus Apostolus dicit: Christi enim
dum s. Li- bonus odor sumus Deo. Erant autem in eo-
borij reli- dem loco aliorum quoque membra Sancto-
quia ele- rum, in sarcophagis honestè reconditorum,
wantur,

Beati
Fecipore... bonus tunc simul, cùm B. Liborij membra de-
tumbâ leuata, in feretro locanda compone-
bantur, prædictus odor numquam defuit;
quò minus dubitaretur illi operi ministerium
præbuisse, quo cœpto, inchoauit; quo finito,
non diutius mansit.

eeea vi sum *13.* Dum hæc in templo agerentur, foris
recipit, *14.* quoque aliud signum eadem contigit horâ.

15. Nam mulier quædam ab annis plurimis cæ-
ca, in conspectu populi, qui satis frequens pro
foribus stabat, interuentu ipsius, cuius corpus
interiùs ad efferendum parabatur, lumen re-
cepit. Et quoniam eius tam prioris ærumnæ,
quam nouæ sanitatis omnes ferè, qui aderant,
testes erant, adeò multitudinis animos res
gesta commouit, vt omnes simul in laudem
Dei, elatâ in excelsum voce, prorumperent.
Quod audientes qui cum Episcopo erant in-
tra clausas oratorij ianuas, statim quæ miraculo
quolibet populum in tantæ gratulatio-
nis clamorem excitatum intelligentes, & ipso
pro viribus Diuinæ pietati gratias agere, ac
amnibus *16.* præ gudio flere cœperunt. Cumque suas
Deum lau- utrimque voces, qui intus & foris erant, re-
danibus: cognoscere

cognoscerent; vno omnes affectu mirabiliter inspirati, in tantum erupere planctum, vt vix quisquam continere lacrymas posset. Sed Episcopus videns cantum Diuinæ laudis fletu exigente intermissum, cœpit rursum antiphonas & psalmos Sanctorum gloriæ congruos cum Clero psallere: atque ita confusæ multitudinis clamorem compescuit.

14. In ipso verò momento, priusquam illud sacratissimum corpus de ecclesiâ, in quâ sumptum est, efferretur, etiam tertio signo eius declarata sunt merita. Denique vir quidam horribiliter longo tempore vexatus à dæmonio, & multis iam famâ tantæ miseriæ factus notissimus, quippe qui per multas ecclesiæ & monasteria ductus, nusquam suæ remedium calamitatis accepit; tandem cum matre propriâ veniens ad ecclesiam, in quâ sacer ille thesaurus adhuc inter Sacerdotum manus habebatur, confessim ita purgatus est, ut ne signum quidem ultrâ talis pertulerit passionis.

15. Tum verò Antistes, ne quam nuntijs *desertur* memoratis moram faceret, eodem die vene- *corpus S. Li-*
randum illud corpus cum omni reuerentiâ *borij ad ba-*
suis & Sacerdotum manibus deportari fecit *silicam Ca-*
in urbem, ad principalem suæ Sedis eccle- *thedralem:*
siam, vt hoc ibi coram populo his, qui acce-
pturi erant, honorifice commendaret. Comi-
tabantur verò, nec usquam deerant, velut præ-
sentis Dei virtutis, Sanctum suum mirifican-

104 VITA S. LIBORII PATRONI

tis, indicia. Nam ubi primum ecclesiæ, quam diximus, illatum est, ingressus pariter qui-

*claudo gres-
sus restitu-
tur,* claudus veroque pede, & multis in hac debilitate detentus annis, mox ut caput ad orandum inclinavit, recepit integrum sanitatem.

*muto loque-
la,* 16. Transacto deinde paruo diei spatio, mutus quidam, diuturno inutilis linguae damnatus silentio, subito sibi vocis organa sentiens restaurata, omnipotentis Dei misericordiam, eiusque Confessoris & Pontificis Liborij patrocinium, plano coram omnibus sermone laudabat.

*contrario
subita inte-
grius,* 17. Sed cum ita coruscantibus supernæ gratiæ beneficijs celeberrimus ageretur dies, postremò maiori quoque miraculo nouum fidelibus gaudium, noua data est materia gratulandi. Licet enim omnia Deo sint æquè facilia, magis tamen solemus mirari, cum dantur noua & numquàm habita, quàm cum amissa restaurantur. Hic eadem rursus fiunt, quæ naturali ordine priùs facta fuerant: ibi mira Dei virtus tribuit, quod natura negauit.

777 Vir quidam abortu nativitatis in tantum à genibus deorsum debilitatus, ut tibiæ cum pedibus arefactæ, graciles & contortæ, omnem ambulandi usum penitus denegarent, in prædictâ ecclesiâ ante veneranda S. Liborij pignora deportatus est: atque illico viuaci vigore neruis venisque infuso, & dissolutis ante compagibus solidatis recto gressu cœpit ingredi.

cedere. Quo cognito , fit ingens admirantis atque gratulantis populi circa eum concursus. Certatim omnibus videre cipientibus, quod paullò antè numquām se visuros arbitrabantur. Neque enim velut infirmis aut titubantibus vestigijs gradiebatur , sed coram omnibus, qui eum numquām anteà sanis terram plantis tetigisse nouerant , celeri motu currens & exiliens, Christo Domino eiusque sancto Confessori gratias referebat. Agebat hoc nimirūm ipse per successorem Apostolorum, qui per ipsos quondam Apostolos eodem modo claudum à natiuitate, simili gratiâ sanari concessit.

18. His ita gestis , cùm inclinatâ iam die Dominicæ noctis appropinquaret exordium, præcepit Episcopus Clerum omnem ad vigiliarum solemnia maturius conuenire, vt his statim peractis, primo diluculo præfatis nutijs optatum munus accipientibus , redeundi ad patriam opportunitas optata daretur. Conuenit autem pariter laicorum grandis *caco nato* numerus, quos ostensa priori diē miracula ad *visus* quærenda sanctorum pignorum patrocinia ingenti delectatione inuitauerant. Cumq[ue] propè finito matutinæ laudis officio, auroræ ortus illucesceret, lux lucis & fons luminis illuminauit ciuem yrbis eiusdem , qui cæcus genitus, usque in diem illum coæuam sibi eam miseriā tolerabat. Sed qui in Euangelio legitur per semetipsum hominem à pœnâ si-

Ioan. 9.1.

G 5 mili

106 VITA S. LIBORII PATRONI

mili liberasse, hunc quoque per electum membrum suum à tenebris diuturnæ noctis eripiens, ignotam priùs lucem videre concessit.

energumento libertas: 19. Eadem horâ eodemque in loco, id est, in ecclesiâ coram Clero diuina carmina concinente, multisque alijs fidelibus aspicien-
tibus, arreptus quidam à dæmonio, vexari mi-
serrimè cœpit. Diu namque ab eo torqueri
antè solebat: sed tum interuentu eiusdem
Confessoris, expulso hoste nequissimo, sosp-
itatem mentis recepit, nec deinde ullum in se-
larualis phantasmatis sensit horrorem.

a Ostendimus superius rectè inuicem congruere cha-
racteres chronologicos h̄c expressos; annumq; Christi
836. fuisse Ludouici Pij 23. à morte Caroli patris, &
24. ex quo imperiali eum diadematæ, ut in Vita eius
dicitur, coronauerat pater, medio ferè ante mortem
suam anno.

b Ita MSS. Corsendone, & Bodec. editi habebant
quarto, perperām, ut suprà ostendimus.

c Vita 1. ac 3. solum habet, Beatissimorum Petri ac
Pauli Apostolorum. Vita 2. in Ecclesiâ Apostolo-
rum. & congruit brevior Translationis historia, quam
mox dabimus.

d De S. Iuliano suprà egimus, & plenius 27. Ia-
nuarij.

e Ea primū S. Matix dedicata, postea S. Iuliano,
cum sub idem ferè tempore huius reliquia in eam essent
à S. Aldrico deportata.

CA-

C A P V T . V.

*Corpus S. LIBORII è Cathedrali
ad S. Vincentij adem transfertur.*

20. Ita illius diei exordio geminatâ lætitiâ *Solenni supo-*
cælitus illustrato, infinitam populi mul- plicatione
titudinem sexus vtriusque atque omnis con- (cuius hic
ditionis & ætatis, tam ex eâ regione, quâm ex ritus expo-
vicinis vrbibus, tantorum signorum latè cir- tur sacrum
cumuolans fama contraxit. Celebratis verò corpus è ba-
Missarum Solennijs, accelerabat Episcopus silicâ maior
sancitum illud corpus his, qui ad patriam se- re:
cum delaturi erant, commendare, ipsumque
cum honore debito ex vrbe deducere, ante-
quâm adueniens turbarum immensitas, eo-
rum iter impediret. Ornatur itaque Clerus
omnis sacerdotalibus & ecclesiasticis indu-
mentis, eleuatoque feretro sanctorum pigno-
rum in humeros Sacerdotum, sonantibus
quoque signis omnium per urbem ecclesia-
rum, ac præeuntibus, qui sanctæ ac viuificæ
Crucis vexilla sanctorumque Euangeliorum
libros ac sacras reliquias in aureis argenteis-
que reconditorijs cum aromatibus præfere-
bant, deducitur cum ingenti cunctorum ve-
neratione, cum psalmis, hymnis & antipho-
nis, in oratorium a S. Vincentij, situm iuxta
portam urbis, per quam egressuri erant,
 21. Prosequebatur autem maxima multi-
 tudo

108 VITA S. LIBORII PATRONI

tudo plebis: sed non minor ibidem obuiauit,
 quæ signorum rumore auditio, vndique con-
 fluebat. Tam verò non leuis oritur contra
 Præsulem populi querimonia, clamantibus
 plurimis, magni se patrocinij tuitione priua-
 ri, ablato à se corpore tanti Confessoris, cuius
 intercessione solerent ab omni aduersitate
 muniri. Hoc suæ regionis vnicum post Deum
 fuisse tutamen, hunc honorem maximum,
 hanc gloriam singularem. Timere se meritò
 posse, ne translatis eius venerandis artibus
 pariter nominis eius in breui veneratio me-
 moriaque neglecta, indignos eos ipsius inter-
 uento apud Dominum faceret. Arbitrari sese,
 Pastoris potius officio conuenire, Sanctorum
 pignora ad munimentum gregis sibi com-
 missi vndecumque adquirere, quam eorum,
 quæ haberent, pretiosissima quæque in alias
 mittere nationes.

22. Commotus aliquantum his vocibus
 Antistes, & maximè lamentantis turbæ accla-
 matione, tandem facto silentio, populum in
 eadem ecclesiâ S. Vincentij ita breuiter allo-
 cutus est; Non est, inquiens, æquum, Fratres,
 quemquam vestrum putare, me in tantum
 aut commissæ mihi sollicitudinis, aut vestræ
 aptâ oratio. simul meæque salutis oblitem, ut hæc nostri
 ne placat S.
 Aldricus
 Ep:
 Ronfus
 O. 110

perpetualis Patroni pignora sine certâ ratio-
 ne ex hoc loco transferri permetterem. Si
 enim, cùm apud nos Sanctorum corpora Deo
 miserante satis abundet, illi populo, qui nuper
 ad

ad fidem vocatus, & eorum aut parum, aut nihil penitus habens, à nobis huius suæ necessitatis solatum humiliter postulat, omnino assensum præbere deditamur, fatendum est, nos Euangelici Apostolicique præcepti contemptores, contra ius caritatis fraternæ, claudere à fratribus viscera nostra. Absit verò hic error procul à cordibus vestris, ut pütetis elec̄tos Dei iam cum ipso regnantes, ibi tantum, ubi corporaliter eorum habentur reliquiae, intercessionis suæ præstare beneficium posse. Quin potius credendum, eius patrocinium in hac Ecclesiâ, quam in carne positus fideliter rexit, & in quâ finem vitæ mortalis accepit, omnibus piè querentibus in perpetuum non defuturum. In illo enim populo, nouiter ad Deum conuerso, nouos sibi seruitores & veneratores acquireret, ad quos corporali præsentia suorum pignorum accedet: sed à vobis spiritualis eius protectio numquam recedet. Sciendum quoque, quod Serenissimus Imperator id ipsum fieri præcepit. Cuius quicumque potestati resistit, Dei nimirum ordinationi resistit. Præterea luce clarius ostensum est, Dei pariter, & huius ipsius sancti Patroni nostri Liborij placere voluntati, ut ad illam, in quâ cum summo cunctorum desiderio expectatur, regionem adueniat. Quod si non ita esset, ab inchoato heri istius Translationis exordio, usque ad hanc horam tanta nequaquam miracula coruscarent. Cum enim

110 VITA S. LIBORII PATRONI

enim placatus potius, quam iratus, Deus dona cælestia largiatur, quisnam existimare potest, quod si hoc opere offenderetur, tantis illud signorum beneficijs illustrasset? Quocirca, Fratres, ab hac intentione desistite, ne Diuinæ dispositioni comprobemini palam resistere voluissē.

dein recensit miraculus, 23. Cūm his & multis alijs admonitionibus, & maximè Dei nutu, sedata plebis commotio quievisset, præcepit Pontifex eos, qui per totum biduum à varijs debilitatibus, seu ab immundis spiritibus, liberati fuerant, in vnum congregatos, ad conspectum multitudinis nouiter aduenientis adduci: ut eorum omnem & pristinæ calamitatis, & nouæ reparationis historiam pandens, Diuinam clementiam faceret ab omnibus vnanimitet collaudari. Vbi primùm verò populus coadunatum illud recens sanatorium agmen *eum ceteris Deo palam gratias agit:* adspexit, & quos nudiustertiū diuersis passionibus affectos, iam tunc sanissimos esse cognovit, subito ex omni parte infinitæ multitudinis vox magnæ gratulationis exoritur. Nec datur ullus Episcopum loquentem audiendi locus: sed nemine tacente, nemine alium expectante, pro se quisque, quā poterat, Deum voce laudabat. Cumq[ue] etiam Clerus, Episcopo incipiente, hymnū **TE DEV M LAVDAMVS**, & quædam alia tantæ lætitiae convenientia decantaret, immensæ illius iubilationis sonus, inexplicibili supernæ laudis delecta-

CALCVLO LABORANTIVM. III
lectatione, in longum diei spatium protela-
tus est.

a Hoc oratorium, ut ex alia Translationis historiâ patet, erat Ecclesia Cœnobij S. Vincentij à S. Domno-
lo Episc. Cenoman. (cuius natalis agitur 1. Decemb.
Translatio 16. Maij) ædificata; dedicata à S. Germano
Ep. Parisien. qui 28. Maij colitur, restaurata à S. Al-
drico, uti scribit Coruasserius.

C A P V T VI.

Miracula facta in itinere Carnotum versus.

24. **Q**uo tandem finito, aduocatis Badu-
radi sæpè memoratis Episcopi Mis-
sis, beatae memoriae Aldricus Antistes pretio-
sissima illa, quæ suprà diximus, pignora co-
ram omni Clero & populo commendauit
sub obtestatione grauissimâ, ut cum digno
semper honore tractarentur, nec eis vnquam
omnis reuerentia cultus Ecclesiastici à quo-
libet Episcopo Paderbornensi, & Clero suo,
quolibet tempore subtraheretur. Dehinc in-
ter utriusque Ecclesiæ, Cenomanicæ videlicet
& præfatæ Paderbornensis congregationis, tem-
firmatâ caritate perpetuæ a fraternitatis, ad
patriam eis redeundi licentiam dedit. Quos
tamen vnâ cum multitudine extra ciuitatem
aliquam diu prosecutus, cum paucis suorum
rediit: quoniam à tam glorioſo comitatu vix
quisquam nif̄ innitus separabatur.

25. Ec

112 VITA S. LIBORII PATRONI

*illi Ceno-
manus i.
Maij leti-
discidunt.*

25. Et illi quidem, annuente perspicuâ Dei clementiâ, voti sui se compotes effectos sum- moperè gratulantes, Kalendis Maij ab vrbe Cenomanicâ profecti, cum omni studio ad patriam festinare contendunt. Cuius itineris gloriam ac lætitiam quis dignè valeat enarra- re? Opportunum tamen credimus, viam omni- nem celeri stylo percurrere, annotatis tan- tū locis, in quibus præcipua sunt, eademque certissima, gesta miracula. Nam omnia, quæ sacrum illud iter cælesti quodam lumine illu- strarunt, ne illorum quidem aliquis, qui præ- fentes fuerunt, dicere aut memoriam potuit retinere.

*Sancti ope-
curati, sur-
dus ac mu-
sus Pont-
leuua,*

26. Illis itaque proficiscentibus, prædictâ die iuxta locum, vulgo b. Pontleuua nomina- tum, secutus è quidam ex familiâ, pertinente ad seruitium Ecclesiæ ipsius S. Liborij, quem & sensum audiendi, & sermonis usum num- quām habuisse magna pars populi nouerat, Dominum suum, ut sui miseretur, quia vo- ce non poterat, gemitu. & lacrymis precaba- tur. Cumque crebrò caput inclinatum, ex- pansæ manus, leuati modò ad cælum, modò ad sacrum feretrum oculi, satis internum eius affectum indicarent, nec iam præ lassitudine sequi longius posset, tandem à pœnâ secum genitâ relaxatus, eo primùm die cœpit & au- diri loquens, & loquentes audire.

infirmas,

27. Inde cœpto itinere properantes, cùm ad ecclesiam quamdam, S. Medardi memoriâ cele-

CALCVLO LABORANTIVM. II

celebrem, propinquarent, ibi in viâ quædam
mulier à longâ infirmitate curata est, quam
per omne tempus vitæ suæ priùs tolerasse fe-
rebatur. De quâ id, quamuis incredibile, mul-
torum tamen relatione asserebatur, quod nul-
lum alimenti genus vñquam gustare potue-
rit; sed cochlearum more, suo vicitans succo,
noxio tantùm aleretur humore. Quod ne-
quaquam affirmantes, id tantum dicimus,
quod verum nouimus, eam ad S. Liborij pa-
trocinium & venisse languidam, & redisse
incolorem.

28. Hinc ad basilicam S. c Symphorij aduenientes, ibidem sunt recepti hospitio, vbi non nra, etem illam splendor pietatis Diuinæ clarè fecit illucescere. Nam fœmina quædā, diu malignorum spirituum se vexantium miserabile receptaculum facta, ad sæpè memorati Confessoris implorandum pro eâ suffragium, in ecclesiam adducta est. Finitis verò matutinis ex more vigilijs, cùm facto iam silentio plebs egressura esset, cœpit subito horrorem diræ vocis emittere, vulnare, mugire, sibilare, ac per omnia belluinos imitari sonos: ut nisi præsens videretur, nihil minus quam mulier putaretur. Terrore cuncti, qui aderant, simul & miseratione permoti, teneri eam, & ad Sanctorum feretrum proprius iuuitam trahi fecerunt. Deinde vnanimes pro illâ preces fundentes, citò exaudiri meruerunt. Denique statim à dæmonum violentiâ liberata, sobria

H mente

114 VITA S. LIBORII PATRONI

mente ac voce gratias & laudes Deo ref-
rens, euntes eos inde diu cum populo seque-
batur.

contractus,

29. Exinde festinato cursu monasterio S. Sul-
pitij appropinquantes, vident eminus adduci
mendicum quemdam in vehiculo, qui miser-
abiliter toto penè contractus corpore fuit.
Nam & pollices utriusque manus erant in
medium palmæ incurvati, & reliqui digiti su-
pra ipsos pollices extensi, ita eos stringebant,
ut vngues radicibus palmarum hæcerent in-
fixi. Reliquum corpus adeò velut in sphæram
rotundatum videres, ut genua pectori, sum-
mitates pedum renibus iungerentur. Sed
quantò eius fuerat miserabilior pœna, tantè
secuta est mirabilior medicina. Interuenienti-
bus namque B. Liborij meritis, cuius opem
integrâ fide implorabat, erectis in momento
ac sanatis omnibus simul membris, prosiliit
de paruo illo, quo vehebatur, curriculo, & ce-
leriter ad loculum sacri corporis currens, ibi-
dem se in terram prostrauit cum ingenti af-
fectu, corde simul & ore, gratias agens. Mi-
rari populus, Deumque sublatis in cælum vo-
cibus collaudare, quod non videretur circa
vuentem hominem amplioris virtutis opus
sub cælo fieri potuisse.

*energume-
nus:*

30. Pergentes verò ad ecclesiam quam-
dam, in honorem S. Petri Apostoli dedica-
tam, subitò dæmoniacum, qui eos aliquam-
diu sequebatur, conspiciunt in viâ media ce-
cidit-

cidisse. Ad quem erendum cùm aliqui ex plebe cucurrisserent, iacuit omnino sine motu aliquo, ut ab omnibus esse mortuus non dubitaretur. Post paullulum tamen erectus ad sedendum, cœpit sensim quasi reviuiscere: & sequenti die coram populo laudes Saluatori suo rependens, sanus apparuit, ac si numquām à maligno fuisset hoste vexatus.

a De eâ fraternitate egimus supra.

b Vulgò Pontlieue in Vitâ S. Hædoindi Ep. 20. Ianuarij cap. 1 n. 3. Pontilema appellatur (forsan vitiōse pro Pontileuca, aut, ut h̄ic, Pontileuua) & Pontileumalense xenodochium; fortè Pontileuualense, uense xenodomnus Bartichrannus eiusdem vrbis Episcopus, dochium et ut ibi dicitur, ipsum xenodochium in Pontilemâ in iam pro dihonore S. Martini fecerat, ut omnes aduentantes, uitibus tam diuites quām & pauperes, ibi receptiones haberent, & alimenta & onera necessaria abundantē inibi acciperent. Colitur S. Bertichrannus 6. Junij.

c Symphoriani legendum, ut patet ex breviori historiâ infrâ num. 7. celebris in Galliâ S. Symphorianus Mar̄yr Augustodunensis 22. Augusti: Symphorium nusquam legi.

C A P V T VII.

Carnoti & Parisijs gesta.

31. PROINDE cùm tantis Diuinorum beneficiorum donis, velut cælestibus radijs, cum Clericantem viam læti carperent, quæ plus quotidie gaudij, quām fatigationis offerret; contigit, ut ad ciuitatem Carnotensem, satis amplam & populosam, deuenirent. Cuius vrbis

H 2 Episco-

116 VITA S. LIBORII PATRONI

Episcopus, & Bernuinus nomine, iam tum ætate simul & moribus valdè maturus, collectis ex more Presbyteris, eo tempore synodum in vrbe celebrabat. Cui cùm nuntiatum esset, qualiter & quo ordine assumptum Cenomanis corpus præfati Confessoris, suæ iam vrbi appropinquaret, statim cum omni illo sacro Sacerdotum collegio, totoque Clero suo & populo, processit in eius occursum, atque cum hymnis & canticis spiritualibus illud deuotissimè extra urbem longè progressus excepit, iussitque ut deferretur per viam, quæ dicit foras muros ciuitatis ad oratorium, in quo S. b Carauni membra requiescunt. Cumque cateruatim sequente grandi multitudine ad memoratum locum honori-
 sonantibus campanis: sicè duceretur, sonantibus signis per totam urbem, & populo excelsâ ad Deum voce proclamante, ut tantam sibi gratam esse deuotionem Dominus declararet, multa ibidem per facta ibi miracula: B. Liborium fieri signa concessit. Ex quibus vnum præcipuum hoc loco memorare decreuimus, reliqua, vitandæ prolixitatis caussâ, intermitentes.
 32. Puella, quæ ab exordio miserandæ natuitatis, membris ferè omnibus curta, & velut in globum contorta, numquàm vel mentum à genibus leuare, vel plantas pedum à femoribus remouere valebat, ante loculum sanctorum cinerum deportata, singulorum officia membrorum cum integerrimâ sanitatem

rate suscepit. Sed quoniam breuis illa vestis,
quâ contractum prius corpusculum facile te-
gebatur, iam erecte stanti non sufficiebat,
quin ex parte nuda videretur; citissimè fideles
quique (nam in ecclesiâ corâ Clero & popu-
lo res gesta est) raptis fœminarū facitergulis
eam contexere, donec allatis sibi congruis in-
dumentis vestiretur. Ibi ergo cum spirituali
lætitia noctem illam transigentes, primo ma-
nè optatum iter arripuere,

33. Appropinquantes verò Parisiensi ciui-
tati, quam flentis Sequanæ cinctam, c Iulius
Cæsar condidisse, & ob similitudem insulæ
maris, d Isus nominatæ, Parisius fertur appel-
lasse; simili modo ab Episcopo loci illius e Er-
canrado nomine, omniq[ue] populo, ultra pon-
tem stratum super memoratum fluuium oc-
currente, suscepti, & in principalem eiusdem
vrbis ecclesiam deduci sunt. Erat autem dies
Dominica. Cumq[ue] Missarum ibidem solen-
nia celebrarentur, deducebatur in medium
fœmina quædā de viciniâ eiusdē loci oriun-
da, quæ cum pœnâ graviissimâ nata, in eadem
præteritum vitæ suæ tempus exegerat. Muta
enim à nativitate & surda, tertio insuper tor-
mento subiacebat, quod videlicet mente ca-
pta, spiritu agitabatur immundo. Hæc in con-
spectu omnium ad Missas circumstantium
vehementer anxiari cœpit & sudare, postre-
mò in paumentum ruit. Post celebrationem
mysteriorum, ad mansionem deportata est,

H 3 &

118 VITA S. LIBORII PATRONI

& ad vesperum rursus in ecclesiam delata, ibi
cum multis alijs pernoctabat. Statimque ut
albescente polo roseum auroræ iubar illuxit,
lux magnæ misericordiæ Dei, effugatis ab eâ
tenebris tortoribus, & auditus illi & vocis
facultatem condonauit. Obstupièrè magnopè
cuncti, qui aderant, videntes eam in uno
momento ita immutatam, ut & vacua esset à
dæmone, quo plena erat, & plenum haberet
membrorum officium, quo vacua fuerat.

34. Euntibus autem illis iuxta f Montem
Martyrum, cùm essent iam à dextro latere in-
signis g monasterij S. Dionysij, occurrit ibi-
dem seruulus quidam de familiâ eiusdem
Martyris, quem & Sacerdotes & cuiuscum-
que gradus Clerici, necnon & plures laici,
contestati sunt ab exordio nativitatis suæ au-
ditus pariter & loquelæ ysu penitus caruisse.
Qui appropinquans sacris pignoribus, ubi vi-
dit plures ē populo pro suâ quemque facul-
tate in honorem S. Liborij, ad eius loculum
iactare munuscula, & ipse quoque satis deuo-
tè aliquid de vestimentis proprijs illuc offer-
re nitebatur. Cuius exemplò adjutus inter-
cessione, apertis auribus & soluto vinculo
linguae in eadem horâ Dei laudes canentem
populum audituit, & ipse simul cum gaudio
decantauit.

a Claudius Roberetus Hieronymum, & Berninum
appellat; alij Geruinum, uti Coruasserius refert.

b S. Carauni, siue Karauni, Carnutum Apostoli,
Gallicè S. Cherion, natalis agitur 16. Maij.

c Ne-

c Neque Parisiorum urbem Caesar condidit, neque ea fortassis sic nuncupata illius auro: sed ciuitas uniuersa, siue gens ipsa, Parisij dicta: urbs pricipua Lusetia, non ab ipso primùm sic appellata, sed anteā (ut lib. 7. de bell. Gall. pater) eo nomine nota, eodē ferè etymo, uti reor, quo in Eburonibus Leoticus, siue Leodicus vicus, etiam tempore Caroli Magni dictus, qua nunc vrbe Lutetia & magna Leodium. Idem enim sunt Leodes, Leudes, Leodium Luidi, liudi, luiti; & fortè læti, acleti: Teutonicè, unde? luden, luyden, lieden, populi, & nonnumquam clien-
tes, siue homines, aut vasalli. Eadem notione Leodienses Gallicè urbem suam Ligē vocant, quod villa ligia, siue latice, id est, militum aut hominum ligiorum, seu vasallorum olim fuerit, cùm in propinquo Iupilia esset palatium regium. sed hac alibi indicata. Quod quidam Lutetiam à luto dictam volunt aut quasi Lutetiam à candore, eruditio nulli prababunt: unde Latina Gra-
cave vocabula, apud interiorem Galliam, Celticâ tunc lingua utentem?

d Nota Ortelio & antiquis Isidis insula, portus, templum, oppidum, regio; diuersa omnia: at nus-
quam nobis Iisius insula lecta. Parisij potius videri pos- unde Par-
sunt ab Iisâ, siue Æsiâ amne, qui nonnullis etiam Isa- sij?
ra, appellati: ab eius enim leuâ ripâ colebant ad Ma-
tronam ac Sequanam amnes, inter Bellovacos ac Mel-
das. Ipsa Lutetia olim posita erat in insulâ fluminis
Sequanæ, in quâ nunc quoque templum Cathedrale,
prolatis utrimque longissimè pomœrijs.

e Claudius Robertus duos eius nominis statuit Pa-
risiorum Episcopos, quorum prior interfuerit an. 829.
Parisensi concilio, (in quo tamen illius nomen non ex-
primitur) alter electioni Hincmari Remensis Archiep.
an. 845. & Parisensi concilio an. 846. Medios loca
Ermfredum, de quo nihil memorat, & Inchadum,
quem interfuisse ait restitutiōnī Ludouici Pij an. 835
objisse 839. At concilio ad Theodonis-villam, in quo
reconciliatus Ludouicus, Ebbo Archiep. Remensis de Erchanradus
positus, Inchadus nullus, sed Erchanradus Episcopus Ep. Parisien-

120 VITA S. LIBORII PATRONI

subscriptus. Anno vero 836. à concilio Aquisgranensi II. ad Pippinum Aquitaniae Regem missi Aldricus Cenomanica urbis & Herchinradus Parisiorum Episcopi. Atque ex hoc ipso coetaneo scriptore patet, Ercanradum tunc Episcopū fuisse, non Inchadum. In Parisiensi concilio an. 846. Erchenradus appellatur; apud Flodoardum lib. 3. cap. 1. Ercamradus.

Mons Matr. f Gallicè Mont-matre. in eo casus capite S. Dionysius Parisorum Apostolus, cum SS. Rustico & Eleutherio, de quibus agemus 9. Octobris. Distabat is locus ab urbe Lutetiâ mille circiter passus, celebratus in annalibus nostris, quod isthic in æde Deipara Virginis S. Ignatius Loyola cum Socijs aliquot, votis Deo nuncupatis, prima posuit conflande Societatis fundamenta.

S. Dionysij monasterium. g Sepultus fuit S. Dionysius in fundo Catulliaco, à Catullâ piâ muliere; ubi dein vicus coaluit, qui in Via S. Genouefæ 3. Ianuarij cap. 4. nu. 16. Catholicensis appellatur, sive Catholacensis, & in 2. Vita n. 14. Catholicensis, diciturq; in sexto à Parisius miliiario situs. Dagobertus Rex sumptuissimam isthic ecclesiam & monasterium edificauit, quod varijs deinde priuilegijs, reliquijs, Regum mausoleis ac donarijs ornatum.

C A P V T VIII.

Iter per Belgium ad Rhenum usque.

323
322
321
323
322
321
320
319
318
317
316
315
314
313
312
311
310
309
308
307
306
305
304
303
302
301
300
299
298
297
296
295
294
293
292
291
290
289
288
287
286
285
284
283
282
281
280
279
278
277
276
275
274
273
272
271
270
269
268
267
266
265
264
263
262
261
260
259
258
257
256
255
254
253
252
251
250
249
248
247
246
245
244
243
242
241
240
239
238
237
236
235
234
233
232
231
230
229
228
227
226
225
224
223
222
221
220
219
218
217
216
215
214
213
212
211
210
209
208
207
206
205
204
203
202
201
200
199
198
197
196
195
194
193
192
191
190
189
188
187
186
185
184
183
182
181
180
179
178
177
176
175
174
173
172
171
170
169
168
167
166
165
164
163
162
161
160
159
158
157
156
155
154
153
152
151
150
149
148
147
146
145
144
143
142
141
140
139
138
137
136
135
134
133
132
131
130
129
128
127
126
125
124
123
122
121
120
119
118
117
116
115
114
113
112
111
110
109
108
107
106
105
104
103
102
101
100
99
98
97
96
95
94
93
92
91
90
89
88
87
86
85
84
83
82
81
80
79
78
77
76
75
74
73
72
71
70
69
68
67
66
65
64
63
62
61
60
59
58
57
56
55
54
53
52
51
50
49
48
47
46
45
44
43
42
41
40
39
38
37
36
35
34
33
32
31
30
29
28
27
26
25
24
23
22
21
20
19
18
17
16
15
14
13
12
11
10
9
8
7
6
5
4
3
2
1
0

35. Interim festinantes cum summâ alacritate iter suum peragere, deuenerunt ad villam, quæ a Gebaloha nominatur. Vbi, sicut anteà multorum fides & deuotio remunera-ta, sic etiam quorundam contumacia dignâ est correptione castigata. Contigit namque ibidem, ut fluuiolum quemdam transire de-berent,

berent. Quò cùm proximarent, hi qui san- *in flumen,*
 etum feretrum portabant, quatuor, qui po- *fracto pon: a,*
 steriora eius tenebant cornua, recto tramite *labuntur,*
 per vadum aquæ incedere volebant. Totidem *vado transi-*
 autem reliqui, priorem eius partem gestantes *re abnuentes*
 in humeris, pontem magis, per quem transi- *ne madefie-*
 rent, quærere se velle asserebant, in tam præ- *rent;*
 claro Sanctorum obsequio calceamenta sua
 madefacere dignantes. Qui cùm ad pon-
 tem quemdam venissent, & venerabilem the-
 saurum secum portantes, super eum transi-
 rent, repente rupto sub pedibus eorum in-
 strumento lignorum, omnes illi, qui in vado
 vel pedes intingere aspernabantur, ex alto
 cadentes, in profundo flumine submersi sunt;
 meritis tamen sanctorum artuum, quos fere-
 bant, illæsi euasere: illud verò sacratissimum
 feretrum ab eâ parte, quâ ab illis, antequam *feretro &*
 caderent, tenebatur, (mirum dictu) nemine *ceteris illa-*
 contingente, in aëre pendebat immobile,
 donec accurrere possent, qui illud accipien-
 tes, ad vadum reueherent: atque ita demum
 cœpto itinere perrexerunt.

36. Ex quo loco non longum iter emensi,
 consuetum virtutis Dei testimonium ad com-
 probanda merita electi sui videre meruerunt.
 Id ipsum tamen, quod factum est, quo appell-
 letur nomine, non satis occurrit. Euentū fuisse
 dixerim? sed non solet res talis casu eueni-
 re. Miraculum nominem? sed id non magno- *energamen*
 perè quisquam eorum admirabatur. *Quis Bauacensis*

722 VITA S. LIBORII PATRONI

enim velut nouum miretur, quod saepius in-
tuetur; Mulier à dæmonio liberata est. Magna
Dei pietas, magnum Confessoris eius meri-
tum, rem alibi raram, in illo itinere fecit esse
visitatam. Quæ tamen mulier tunc à valdè
diuturnâ vexatione saluata, (nam quindecim
annis eâ laborauerat) haudquaquam ingrata
suo extitit Saluatori. Cùm enim esset de ca-
stello, quod b Bauaca nominatur, non infimis
orta natalibus, relictâ patriâ & parentibus,
Deo & S. Liborio sedum viueret, seruituram
deuouit; secutaque sancta pignora usque ad
locum, in quo hactenus requiescunt, in eo-
rum seruitio reliquum vitæ suæ spatum trans-
egit. Circa hæc eadem loca & alia plurima
sunt in viâ ostensa miracula: sed nobis festi-
nantes illos ad patriam stylo prosequentibus
non vacat in singulis immorari.

37. Cùm ad Rhenum fluum peruenis-
sent, erant in sancto illo comitatu prouincia-
rum occidentalium populi infinitæ multitu-
dinis, qui de longinquis locis illuc securti, iam
necessariò reuerti ad propria debuerunt. Oc-
currit verò nō minor mortalium numerus ex
nationibus orientalem eiusdē fluminis ripam
incolentibus; & maximè Saxones nostri, quo-
rum confinia non longè ab amne memo-
rato distant. Ipsi enim nuper ad fidem vocati,
auditâ tantorum famâ signorum gregatim ex-
suis vndique locis eò confluxere. Stabant igit-
ur in vitroque littore turbæ innumerabiles,
diuerso

*Sancti ser-
vizio se de-
nuet:*

*alia mira-
cula;*

*plurimi piè
comitar-
tior.*

diuerso nimis affectu sese inuicem contem-
plantes. Siquidem suscepturis pretiosum illum donec Rhe-
thesaurum quantum gratulationis & gaudij, num trai-
dimissuris verò quantum mœroris & gemi- ciant: 13
tus hora illa attulerit, quis vñquam exprime-
re poterit? Denique statim ut sancti corporis 22
baiuli nauem introierunt, vniuersa plebs, quæ
diutius sequi non valebat, vnanimiter sese in
terram prosternens, cum ingenti gemitu &
intentâ supplicatione B. Liborij se patrocinio
commendabat, testes quodammodo affectus
sui largos lacrymarum imbres effundens. Par-
modo & hi, qui in citeriore littore expecta-
bant, terræ aduoluti, sacra pignora cum
omni, quo poterant, honore suscipientes, &
gratias agentes Deo, læti cum laudibus de-
duxere.

a ms. Bodecen. Gebalhoha.

b Bauacum, hic Bauaca, oppidum est Hannonia Bauacum
antiquissimum, ac præcipua Romanorum in Neruijs vetus oppi-
statio. Bávavæ Ptolemao, fortè Bávavæ, Bagacum dum.
Neruiorum Antonino, viiis. Ianuarij diximus, cum
de Transtiarione reliquiarum S. Mauri Abbatis agere-
mus: pro quo est in tabula Peutingeriana Baca Coner-
uio, pro Bacaco Neruio. Isthic Circiruina visuntur,
ingentium edificiorum fundamenta, nec procul inde
aqueductum vestigia, aliaq[ue] monumenta antiquita-
tis, atque illud ferè præcipuum, quod septem via mili-
tares Romanorum inde ad varias urbes ducunt: qua-
rum quæ celeberrima, quæ per pagum Brunehaule
ducta (restaurata quidam non in eruditii à Brunehilde
Reginâ autumant, quo argumento, ipsi viderint) vul-
gò la Chaussee de Brunault appellatur, & Coloniam
usque tendit, ut in Itinerario Antonini itur, Bagaco,
Vodgo-

Vodgoriacum, Geminiacum, Perniciacum (*melius*
Peruiciacum) Aduacam Tungrorum, Corioual-
lum, Iuliacum, Coloniam: *quorum locorum hac nunc*
nomina sunt, & Gallica, totidem Teutonica: Bauay,
Woudray, Gemblours, Pervvez; Tongeren, Alt-
Falckenborg, Gulich, Colen.

C A P V T I X.

S. LIBORII *corpus Paderbornam*
deportatum.

38. *occurrunt cateruatum* **I**gitur ingressi Saxoniam, præ nimiâ sibi
Vestphali: obuiante turbâ vix gradum mouere po-
terant. Totis tamen nisibus iter accelerantes,
tandem die tertio, id est, quinto Kalendarum
Iuniarum, quo tunc sacra Pentecostes solen-
nitas agebatur, ad desideratam diu Pader-
bornensem ecclesiam peruererunt. A quâ
cùm adhuc tribus distarent millibüs, iuxta
fluum quemdam à Hedraha vocatum, ob
immensam multitudinem, quæ usque ad me-
moratum locum sequi non poterat, in medio
campo Missarum celebrauere solemnia. Quæ
infirmis. antequām finirentur, in eodem loco quin-
sanati: que pariter homines à varijs debilitatibus li-
berati, caussam immensæ admirationis & læ-
titie tantam Dei virtutem videnti populo pre-
buere.

39. Insuper eadem horâ in sæpè memo-
ratâ Paderbornensis monasterij ecclesiâ, cui
talis gloriæ decus per tanta terrarum spatia
affe-

afferebatur, contigit quoddam clarum valde
miraculum, velut insigni præconio B. Liborij
aduentum annuntians. Nam puer quidam de *puero vox*
eadem oriundus parochiâ, qui à die natiuita- *auditus sibi* *17.*
tis suæ surdus erat & mutus, ibidem auditum *diuinitus* *33.*
pariter percipere meruit & loquela *confertur*.
bat hoc nimis Diuina dispensatio, ut in
die aduentus ipsius tot signa coruscantia in-
dicio essent, eumdem locum ad hoc fuisse
cælitus electum, ut tanti Confessoris corpore
illustraretur.

40. Quod cum innumeris vndeque sti- *magnâ omni-*
patum turbis, monasterio paullatim appro- *nium ordi-*
pinquare cœpisset, Episcopus quidem nequi- *num accla-*
bat occurtere, (nam apud palatum tunc mo- *matione &*
rabatur) sed tamen Clerus omnis cum uni- *pietate,*
uersis Ecclesiastici cultus ornamenti proces-
sit obuiam, sequente populo, qui vel de lon-
ginquis venerat, vel ex eodem oppido & vi-
cinis locis illuc ad audienda Misericordiarum solen-
nia in tantâ festiuitate fuerat congregatus.
Cumque sibi non paruo ab oppido interuallo
uterque populus, sequentium videlicet vene-
rabile corpus atque excipientium, obuiasset,
ij qui occurrerant, ter cuncti simul solo pro-
strati, summâ illud cum veneratione suscep-
runt. Cumque Clerus in hymnis & confes-
sionibus Deum benediceret, & spiritualium
carminum melodiam, Sanctorum laudi con-
gruam, concineret, populus verò **K Y R I E**
E L E I S O N ingeminaret, cum ineffabili iubi-
lo

126 VITA S. LIBORII PATRONI

lo erectis ad Deum mentibus singulorum,
 nihil eius laude dulcius videbatur : ita ut in
 huius vitæ exilio similitudinem quamdam
 beatitudinis, quæ in patriâ speratur , prægu-
 stasle viderentur, de quâ dicitur : Beati qui
 habitant in domo tuâ Domine : in secula se-
 cularum laudabunt te. Quem illis tantum di-
 uinæ laudis amorem , eius meritis credimus
 inspiratum, in cuius tunc exequiarum hono-
 rem fuerant congregati: quoniam & ipsius
 sola in cælis beatitudo, vita & gloria, non nisi
 laus Dei est, in cuius caritate perfectâ ad tan-
 tum ipse sanctitatis culmen ascendit. Itaque
 cùm sensim magis ac magis in altum subla-
 tæ populi voces attollerentur, etiam circum-
 quaque gaudentium, psallentium, Deo gratias
 agentium & iubilantium, illi in voce exulta-
 tionis per totam viciniam sonitus intonarent,
 cùm tali honore sacratissimum corpus in ec-
 clesiam delatum, & in loco, in quo hactenùs
 requiescit, collocatum est. Vbi quantis post-
 modùm miraculis effulserit, quanta sanitatum
 dona præstiterit, alibi dicenda reserua-
 mus, hîc præsenti libello terminum impon-
 nentes.

*Epilogus
Auctoris.*

720
*multa sunt
miracula.* 41. Hæc denique secundum tuum, Præsul
 venerande, præceptum, nostrumque propo-
 situm, de ijs quæ in Translatione eius gesta
 sunt, non quidem ut voluimus, & tantæ rei
 conueniebat, sed ut potuimus, & scientia sup-
 petebat, describere curauimus: non magni-
 pen-

pendentes in sermonum qualitate reprehendi, dum tantum integræ veritatis fide seruatâ diuinæ operationis insignia silentio tegi nequaquam permitteremus. Nostri enim propositi necessitas admonet, ut in huiusmodi operibus nobis iniunctis id omnimodis elaboremus, ut si nos imperitia facit ineloquentes, deuotio tamen ostendat obedientes. Nec infructuoso nos sudore laborasse confidimus, si alicuius lectoris hæc in manus sumere dignantis, vel cuiuscumque audientis animus in laudem largitoris tantarum virtutum fuerit excitatus. Merito namque laudes illi & grates toto corde referimus, qui nos inter tot æternas seculi laborantes, tantorum Patronorum suffragijs tueri dignatur. Qui per visibiles corporum curationes ad internam nos animalium salutem quærendam pronocantes, spem tribuant per eorum exempla & intercessiones illuc perueniendi ex hac valle lacrymarum, vbi absterget Deus omnem lacrymam ab oculis Sanctorum. Quòd qui iam Sanctum suum Liborium feliciter perduxit, nos quoque licet indignos, eius interuentu, venire concedat, qui in Trinitate perfectâ unus & verus viuit & gloriatur Deus per infinita secula seculorum, Amen.

a Serena vocatur in minori historiâ. Viderur is esse fluvius, qui Salcotennâ defluit iuxta arcem & pagum Werne. Sanè Ioannes Gigas, sive Riese, in Prodromo Geographico, viam regiam à Rheno Paderbornam ita describit: Duisburgo, Brock, Mollen, Essendiam,

Boett-

128 VITA S. LIBORII PATRONI

Boeckum, Tremoniam, Vnnam, Gesekenam, Saltkottenam, Paderbornam. in quâ viâ is quem dixi fluuius occurrit, congruente dimensione, qua in historiâ assignatur. Neque nomen fluuij Serena, à Verne aut Werne, arcis ac pagi nomine multùm ab ludit. Verena fortassis, aut Werena, scriptum olim fuit.

E I V S D E M
T R A N S L A T I O N I S
H I S T O R I A ,

Ex veteri Legendario Eccl. Cenoman.

Baderadus Ep. diuino monitu it Cenomanos, Reliquias petitus,



Empore quo Cenomanica Ecclesia B. Aldrico Pontifice gloriabatur, & Gallia sub Ludouico Pio Rege & Imperatore florebat; Baderato venerabili Patroburnensi, Saxoniæ regionis, Episcopo, vnde a B. Aldricus oriundus erat, Diuinâ iniunctum est reuelatione, ad urbem Cenomanicam proficiisci, sacrarum reliquiarum perdiuitem, & inde aliquæ ibi quiescentium deferre Sanctorum, toti Saxoniæ, de nouo ad fidem Christi conuersæ, sacris meritis profuturum. Qui nihil cunctatus Diuinis obedire præceptis, adhibitis sibi reuerentioribus suæ Ecclesiæ personis, eò proficiisci decreuit. Sed ut sacræ petitioni regia quoque sub-